

# ዮሀንሳ አጁታ ጊደ ቆፋ

ዮሀንሳ አጁታይ ፃፊተዳይ አማኒዛይቲ ዩሱስ ኪርስቶስ ኢስታስ ጎዳ ጊዲዳይሳ ኤሪዲ አማኒዳ ገሽ ጎዴቴሌኔ ዋይይ ኢስታ ቦላ ጋኪዳ ዋዴና። ፃፊዚ ማፃፋዛ ናባቢዛይቲ ባ ሂደታ ቃንጾንታ ማላ ኢስታ ሚንጮላናሲኔ ቤና ጋኪዳ ጎዴቴላኒኔ ሜቶ ጋርሳን ኢስቲ ባ አማናን ሚኒ ኤቃና ማላ ሚንጮላናሳ።

ሃ ማፃፋን ዳሪዛ ባጋይ ዳር ዲማ ዲማ ኦይኬቲ ዲዛ አጁታታ ኢሲ ቦላ ጋሐ ኦይኪዴስ፤ አጁታቲካ ሄ ዋዴ ዲዛ አማኒዛ አሳይ ኤሪናስ ዳንዳዩዛዚ ጊዲሺን ሃንኮ አሳስ ቃስ ጌሎንታ ፀራ ጊዲዲ ሸቂዳ ለሚሶ ማላን ሸቂዳ ዮጾኮ። ሺሪ ሺሪ ዩግዛ ማላ ማፃፋዛስ ዋና ቆፋቲ ዲማ ዲማ አጁታታ ባጋራ ዲማ ዲማ ሜታን ዛሪቲ ዛሪቲ ሸቂዳ። ሃ ማፃፋዛ ቢርሼሌ ዲማ ዲማ ጊዲኮካ ኢዛስ አይፌ ቆፋይ ቃስ ቆንጩ። ሄሲካ ያሲ ጎዳ ዩሱሳ ባጋራ ናምዓንሉይ ባይንዳ ኦጌራ ፃላዔራ ኢዛ ሞርኬታ ወርሲ ያናና። ሄ ያናዚካ ወሪዳፔ ጉዬ ባስ አማኔቲዳ ባ ላኔታስ ኢዚ ኦራላ ሳሎኔ ኦራላ ቢታ አንጀ ላቲሳና ጊዛይሳ።

- ሃ ማፃፋይ ኦይኪዳ ኩሜላ ቆፋ
- ጌሎሶ 1:1-8
- ኮይሮ ቤቲዳ አጁታ 1:9-20
- ላፑን ዋሳ ኬላታስ ዩዴቲዳ ኪታታ 2:1-3:22
- ማፃፋዛኔ ላፑን ማታሜታ 4:1-8:1
- ላፑን ፀረምባታ 8:2-11:19
- ዳዌዛኔ ናምዑ ዶባታ 12:1-13:18
- ዲማ ዲማ አጁታታ 14:1-15:8
- ያሳ ሃንቆ ፀዓታ ላፑናታ 16:1-21
- ባቢሎኔ ኩንዴሐ፣ ዶባዛ ዋርዶ ናቤታኔ ዳቡሎሳ ያኔቴሐ 17:1-20:10
- ወርሴላ ፒርዳ 20:11-15
- ኦራላ ሳሎ፣ ኦራላ ቢታኔ ኦራላ ዩሩሳላሜ 21:1-22:5 ኩሻ ቆፋ 22:6-21

1 ሃይሲ አጁታዚ ማታ ዋዴ ቢታ ቦላ ሃናናይሳ ባስ ኦሊዛይታ ቤሳና ማላ ያሲ ዩሱስ ኪርስቶሳስ ኢሚዳይሳ።

ዬሱስ ኪርሰቶስካ ባ ኪታንቻ ኪቲዲ ባ ኦሳንቻዛ የሃኒሳሰ ሃይሳ አጃታዛ ቆንጨሲዳስ። <sup>2</sup> የሃኒሲካ ያሳ ቃላ ጊሺኔ ዬሱስ ኪርሰቶሲ ታማርሲዳ ቱማ ጊሽ ቃሴካ ኢዚ ባ ኣይፊን ቤዩዲይሳካ ወርሲ ማርካቲዳስ። <sup>3</sup> ሃይሲ ወሪካ ሃናናይ ማታ ዎዴን ጊዲዳ ጊሽ ሃይሳ ቲንቢቲ ቃላ ናባቢዛ ኣሲ ኣንጃቲዳዴ። ሃሳሶካ ቲንቢቲ ቃላ ሲዩዛይቲኔ ሃ ቲንቢቲ ቃላ ፃፊቲዳይሳ ፖሊ ኦሊዛይቲ ኢሰቲ ኣንጃቲዳይታ።

**ኢሲያን ዲዛ ላቸን ዎሳ ኬላታሰ ኪቲቲዳ ሳርካ**

<sup>4-5</sup> ኢሲያን ዲዛ ላቸን ዎሳ ኬላታሰ ካሴካ ዲዛይሳፊ፡ ሃዒካ ዲዛይሳፊ፡ \* ቡርካ ያና ያሳፊ ኢዛ ኣልጋ ሲንላን ዲዛ ላቸን ኣያናታፔ ሃሳሶካ ሃይቆፔ ዴንላን ባይራ ጊዲዳይሳፊ፡ ሃ ቢታ ካዎታሰ ካዎኔ ኣማኔቲዳ ማርካ ጊዲዳይሳፊ፡ ኦና ሲቁዛይሳፊኔ ባ ሱላን ኦና ኦ ናጋራፔ ጌሺዳ ዬሱስ ኪርሰቶሳፔ ኪያቴሌኔ ሳርቲሌ ኣንቲሰ ጊዳ። \* <sup>6</sup> ኦኒ ዬሱስ ኪርሰቶሳ ኣዎ ያሳሰ ኦላና ማላ ኦና ኢዚ ካዎታኔ ቁሴታ ኬሲዳ ዬሱስ ኪርሰቶሳሰ ቦንቾይኔ ዎልቃይ ሜርናፔ ሜርና ጋካናሰ ኢዛሰ ጊዳ! ኣሚን። \*

<sup>7</sup> ሄኮ ኢዚ ሳሎፔ ሻራራ ጊታ ቦንቾራ ያና። ካሴ ኢዛ ጫዲ ዎጲዳይቲካ ኣቶንታ ኣሲ ወሪካ ኢዛ ቤያና። ቢታ ቦላ ዲዛ ዴሬይካ ወሪካ ኢዛ ጊሽ ዩካና። ሃይሲ ሃ የፆዚ ቱሙኮ! ኣሚን። \*

<sup>8</sup> ካሴካ፡ ሃዒካ ዲዛይሲ ቡርፔካ ያናይሲ ወርሲ ዳንዳዩዛ ጎዳ ያሲ “ኣልፋይኔ ኦሜጋይ፡ ኮይርይኔ ወርሴሌ ታና” ጌሰ። \*

**ኪርሰቶሲ አጃታን ቆንጨሺን**

<sup>9</sup> ታኒ ዬሱሳ ዎዩዛ ኢዛ ካዎቲላ ቃሴካ ኢዛ ዳንዳያን ኣንቲናራ ኢሲፊ ጊዲዳ ታ ኣንቲ ኣሻይ የሃኒሲ ያሳ ቃላኒኔ ዬሱሳሰ ማርካቲዳ ጊሽ ቃሹታዳ ፊፂሞ ጌቲቲዛ ኣባ ጊደን ዲዛ ዴሬ ዳሪን ዳይሰ። <sup>10</sup> ታኒ ጎዳ ጋላሰ ፂሎ ኣያናን ጲሰኮ ማላ ጮ ሊጲጲ ጊሺን ዳንኬ ጊሪሳ ማላይ ጊታ ጊሪሰ ታፔ ጉዬራ፡ <sup>11</sup> “ኦኒ ቤዩዛይሳ ዎራቃታን ፃፋዳ ላቸን ዎሳ ኬላታሰ ሄይቲካ ኤፔሶኔስ፡ ሳሜርኔሴስ፡ ጳርጋሞኔስ፡ ቲያፂርኔስ፡ ሳርዴሴስ፡ ፒላዳልፊያሲኔ ሎዶቂያሰ ዬዳ” ጊሺን ሲያዲሰ።

\* 1:4-5 ኬሳ 3:14፤ አጃ. 4:5 \* 1:4-5 ኢሳ 55:4፤ ማዛ 89:27 \* 1:6 ኬሳ 19:6፤ አጃ. 5:10 \* 1:7 ዳኔ 7:13፤ ማቶ 24:30፤ ማር 13:26፤ ሉቃ 21:27፤ 1ታሶ 4:17፤ ዛካ 12:10፤ የሃ 19:34፡37 \* 1:8 ኬሳ 3:14

12 ሃሳ ታስ ኦኒ የተዳኮኔ ኤራና ጋዳ ታ ጉዬ ዩያ ጃሊዛ ዋዳ የምፔ ኢስታ ቦላ ዋሊዛ ዋርቃፌ ኦሴቲዳ ላፑን ባላታ ቤያዲስ። 13 ሄ ኢስታ ቦላ የምፔ ዋሊዛ ባላታ ጊደን አሳ ና ሚሳቲዛዳ ዳማዲስ። ኢዚካ ሂርኪ ቶሆ ቁርጾ ጋኪዛ አዲሳ ማይያ ማይዒዳስ፤ ቲራ ቦላካ ዋርቃ ማይያ ማይዒዳስ። \*

14 ኢዛ ሁዔይኔ ኢዛ ሁዔ ቢናናይ ቃስ ቦላ ሻቾ ሚሳቲዛ ቦላ ሱፌ ጌቲቲዛ ካላ ማላ። ኢዛ አይፊቲካ ታማ ላጮ ሚሳቲቲስ።

\* 15 ኢዛ ቶሆቲ ታማ ቦንቆን ቆጭቲ ኬዚዳ ፃርቁማላ ሚሳቲቲስ። ኢዛ ቃላይካ ዋልቃማ ፒሳ ሃሌ ጊሪዛ ማላ ጊሬስ። \* 16 ኢዚ ባ ኡሻቾ ኩሼን ላፑን ያለንቲታ ኦይኪዲ ኡቲዳስ። ኢዛ ዲናፔ ናምዑ ባጋራ ቃራ ማሻይ ኬዜስ። ኢዛ አይፊሶይ አዋ አርሼ ማላ ያልቁቲስ።

17 ታኒ ሃሳ ቤያዳ ሃይቁዳ አስ ሚሳታዳ ኢዛ ቶሆ ጋርሳን ኩንዳዲስ። ኢዚ ቃስ ታ ቦላ ባ ኡሻቾ ኩሼ ዋሊዲ “ኔ ባቦፋ! ኮይሮይኔ ወርሴላ ታና። \* 18 ታኒ ፓፃ ዳይስ። ካሴ ሃይቃዲስኮሺን ሄኮ ታኒ ሃይሳፌ ሜርናስ ፓፃ ዳና። ሃይቆ ቦላኔ ሲያሌ ቦላ ታኒ ጎዳ። 19 ሃሳ ጊሽ ኔኒ ቤዪዳይሳ ሃዒ ዲዛይሳኔ ጉዬፔ ሃናናይሳ ዓፋ። 20 ኔኒ ታ ኡሻቾ ኩሼን ቤዪዳ ላፑን ያለንቲታኔ የምፔ ኢስታ ቦላ ዋሊዛ ዋርቃፌ ኦሴቲዳ ላፑን ባላታ ፀራይ ሄኮ ሃይሳ። ላፑን ያለንቲቲ ላፑን ዋሳ ኬላታ ኪታንቻታ። የምፔ ኢስታ ቦላ ዋሊዛ ላፑን ዋርቃ ባላቲ ላፑን ዋሳ ኬላታ።”

## 2

### ኤፌሶኔ ዋሳ ኬላ

1 “ኤፌሶኔን ዋሳ ኬላ ኪታንቻስ ሃይሲ ላፑን ያለንቲታ ባ ኡሻቾ ኩሼን ኦይኪዳዳፊኔ ኢስታ ቦላ የምፔ ዋሊዛ ላፑን ዋርቃ ባላታ ጊደን ሲሜራቲዛዳፊ የቲቲዳስ። 2 ታኒ ኔ አሶዛ፣ ዳፌቲላኔ ዳንዳያካ ኤራይስ። ኔኒ ቃስ ኢታታ ዬጋ አፋናስ ዳንዳዮንታይሳ ሃዋሬታ ጊደንታ ዲሼ ባና ሃዋሬታ ጊዛይታካ ሻካዳ ኢስቲ ዋርዳንቻታ ጊዳይሳ ኔ ጋካ ዳሚዳይሳ ታ ኤራይስ። 3 ኔኒ ዳንዳያን ሚና ኤቁዳይሳኔ ታ ሱንላ ጊሽ ሳሌቶንታ ኔ ዋዬ ቤዪዳይሳ ታ ኤራይስ። 4 ጊዲኮካ ታ ኔና ካጂዛ ኢሲ ሚሺ ዳስ። ሄሲካ ኔኒ ካሴ ኔ ሲቆዛ አጋዳሳ። 5 ኔኒ ካሴ አይ ማላ

\* 1:13 ዳኔ 7:13፤ 10:5 \* 1:14 ዳኔ 7:9፤ 10:6 \* 1:15 ሂዚ 1:24፤ 43:2 \* 1:17 ኢሳ 44:6፤ 48:12፤ እጁ 2:8፤ 22:13

ጾቃሶን ዳሼ ሃዲ ቃስ ኔ ዋና ኩንዲዲኮኔ እኔ ዩሻ ቆፓዳ ማርቴላን ሲማ ጌላ። ኔ ካሴ ኦሲዛ ቤኒ ኔ ኦሶዛ ዛራ ኦላ። ኔ ሄሳ ወርሳ ዛራ ኦሶንታ ኢዲኮ ታ ኔኮ ያና። ኔኒ ማርቴላን ጌሎንታ ኢዲኮ ኔ ያምፔ ኢዛ ቦላ ዋሲዛ ባላ ሄ ኢዚ ዲዛሶፔ ታ ዴንላዩቻና።  
6 ጊዶ ኣቲን ታ ኔና ጋላቲዛ ኢሲ ሚሺ ዴሰ። ሄሲካ ታኒ ኢዲዛ ኒቆላ ባጋ ኣሳ ኦሶ ኔካ ኢዳዳ።

7 “እያናይ ዋሳ ኬላታሰ ገዛይሳ ሃይሊ ዲዛዴይ ወሪካ ሲዮ! ‘ዮኒዳዴይ ያሳ ጋናቴ ጊዶን ዲዛ ዴዖ ሚላ ኣይፌ ማና ማላ ታ ኦላና።”

**ሳማርኔሴ ዋሳ ኬላ**

8 “ሳማርኔሴ ዋሳ ኬላ ከታንቻሰ፣ ሃይሲ ኮይሮኔ ወርሴላ ጊዲዳይሳፌ ካሴ ሃይቂዳይሳፌኔ ሃዲ ቃስ ፓፃ ዲዛይሳፌ ዮቴቲዳዛ። \* 9 ታኒ ኔ ዋዬዛኔ ኔ ማንቆቴላ ኤራይሰ። ጊዲኮካ ኔኒ ዲሬኮ። ኣይሁዳ ጊዶንታ ዲሼ ባና ኦኒ ኣይሁዳኮ ገዛ ፃላዔ ማባራ ጊዲዳይቲ ሃይቲ ኔ ሱንሳ ሞርይሳ ታ ኤራይሰ። 10 ቡሮ ሲንላፌ ኔ ቦላ ጋካና ሜቶሰ ባቦፋ። ኣንቴ ፓጩታና ማላ ኣንቴፌ ኢሲ ኢሲ ኣሰ ዳቡሎሲ ቃሾ ኬሌ ጌለላና። ታሙ ጋላሰ ጋካናሰ ኣንቴ ዋዬ ቤያናሺን ኔ ሃይቃና ጋካናሰ ኣማኔቲዳዴ ጊዳ። ታኒ ኔሰ ማርና ዴዖ ኣክሊሌ ሂሰታ ኣማና።

11 “እያናይ ዋሳ ኬላታሰ ገዛይሳ ሃይሊ ዲዛዴይ ሲዮ! ዮኒዳዴይ ናምዓንላ ሃይቆን ቆሄቴና” ጋ ፃፋ ጊዴሰ። \*

**ጴርጋሞኔ ዋሳ ኬላ**

12 ጴርጋሞኔ ዋሳ ኬላ ከታንቻሰ “ሃይሲ ናምዑ ባጋራ ቃራ ማሻ ኦይኪዳይሳፌ ዮቴቲዳዛ። 13 ኔኒ ፃላዔ ኣልጋይ ዲዛሶን ዲዛይሳ ታኒ ኤራይሰ። ጊዶ ኣቲን ኔኒ ታ ሱንሳ ሎዔላ ኦይካዳሳ። ኔ ታና ኣማኒዛይሳ ኣጋቤይካ። ታሰ ኣማኔቲዳ ማርካ ጊዲዳ ኣንቲጳሲ ፃላዔይ ዲዛ ኣንቴ ካታማን ኣሳ ኩሼን ሃይቂዳ ዋዴካ ኔ ታና ኣማኖ ኣጋቤይካ። 14 ጊዲኮካ ታ ኔና ካጲዛ ኢሲ ሚሺ ኔ ቦላ ዴሰ። ሄሲካ ባላዓሜ ቲሚርቴ ኦይኪዳ ኢሲ ኢሲ ኣሳቲ ኣንቴ ጊዶን ዴቴሰ። ሄሲ ባላዓሜይ ኢሰራዔሌ ኣሳይ ኤቃሰ ያርሼቲዳ ካሳ ሚዲኔ ላይማ ላይማቲዲ ጴጶታና ማላ ባላቄ ዘሪዳዴ። \* 15 ሄሳላካ ኒቆላ ባጋ ኣሳታ ቲሚርቴ ኦይኪዳ ኣሳቲካ ኣንቴ ጊዶን ዴቴሰ። 16 ሃሳ ጊሽ ማርቴላን ጌላ፤ ኣካይ ጊኮ ታኒ

\* 2:8 ኢሳ 44:6፤ 48:12፤ እጁ 1:17፤ 22:13 \* 2:11 እጁ 20:14፤ 21:8 \* 2:14 ታይ 22:5፤7፤ 31:16፤ ዛሬ 23:4፤ ታይ 25:1-3

ኤሌሳዳ ኔኮ ባዳ ኔና ታ ዲናፔ ኬዚዛ ማሻ ሚሳቲዛ ቃላራ ኦላና።

17 “እያናይ ዋሳ ኬላታሰ ገዛይሳ ሃይሌ ዲዛዴይ ሲዮ! ያኒዳዴሰ ታ ቆታን ዲዛ ማናፌ አማና። ኢዚ ታሰ ገዲዳይሳ ቤሳናሰ ኢዛ ቦላ ኦራላ ሱንሌ ፃፌቲዳ ቦላ ሹቾ ኢዛሰ ታ አማና። ሄሳካ ኤኪዳዴፌ ኣቲን ሃራ ኣሲ ኦኒካ ኤሬና። \* ”

**ቲያዲሮኔ ዋሳ ኬላ**

18 “ቲያዲሮኔ ዋሳ ኬላ ኪታንቻሰ ሂዘጋ ፃፋ ‘ሃይሲ ታማ ላጮ ሚሳቲዛ ኣይፌቲ ዲዛዴፌኔ ቦንቂዳ ታማን ጌሊ ቆፃቲ ኬዚዳ ፃርቁማላ ሚሳቲዛ ቶሆቲ ዲዛዴፌ ያሳ ናፔ ኪቲቲዳዛ። 19 ታኒ ኔ ኦሶኔ ኔ ሲቆ፣ ኔ አማኖኔ ኔ ሃጋዞ፣ ኔ ዳንዲያን ሚኖይሳካ ኤራይሰ። ካሴ ኦሶዛፔ ጉዬይሲ ኣጲዛይሳካ ታ ኤራይሰ። 20 ገደ ኣቲን ታ ኔና ካጲዛ ሚሺ ዴሰ። ሄሲካ ባና ‘ታ ናቤ’ ገዛ ማጫሳዮ ኤሊዛቤሎ ኔኒ ቤሳ ኣጊዳ ገሽ ኢዛ ታሰ ኦሌዛይቲ ላይማ ላይማታና ማላኔ ኤቃሰ ያርሼቲዳ ካላ ማና ማላ ኢዛ ታማርሳዳ ባሌላዲሰ። \* 21 ኢዛ ማርቲላን ጌላና ማላ ታ ኢዚሰ ዋዴ አማዲሰሂን፣ ኢዛ ቃሰ ባ ላይማቲላፌ ሲማናሰ ኮያቤይኩ። 22 ሄሳ ገሽ ታ ኢዞ ዋዬ ኣልጋ ቦላ ዬጋና። ኢዚራ ኦሌዳ ኣሳቲ ባ ኢታ ኦሶፔ ማርቲላን ሲሞንታ ኢዲኮ ኢዚራ ኢሲፌ ላይማቲዳ ኡባታ ቦላ ገታ ሜቶ ታ ኤሃና። 23 ታኒ ኢዚ ናይታ ሃይቆን ቃፃያና። ዋሳ ኬላቲ ዉሪካ ኣሳ ቆፋኔ ኣሳ ኣሞ ሻካ ኤሪዛይ ታና ገዲዳይሳ ኤራና። ታኒ ኢንቴሰ ኢሳሰ ኢሳሰ ኢዛዴ ኦሶ ማላ አማና።

24 “ቲያዲሮኔን ዲዛይታሰ ኢንቴሲኔ ሃይሳ ኢታ ቲሚርቲ ታማርንታይታሰ ኡባሰ ሄሳላካ ኢሲ ኢሲ ‘ፃላዴሰ ሃይሲ ጨማ ፀራ’ ጌቲቲዛይሳ ካሎንታይታ ኢንቴና ታኒ ሃራ ቶሆ ቶሲኬ። 25 ገዲኮካ ታ ሄ ባና ጋካናሰ ኢንቴሰ ዲዛዝ ዉርሲ ሚንሌ ኦይኪቲ። 26 ያኒዳዴሲኔ ታ ኦሶን ዉርሴላ ጋካናሰ ሚኒዛዴሰ ኣይዛቤታ ቦላ ታ ጎዳቲላ አማና። 27 ኢዚ ኢሰታ ቢራታ ጉፊራ ሃራና። ኡርቃፌ ሜቆቲዳ ሚሻ ማላ ኢዚ ቡኪዲ ለቆሳና። ሄሲ ሄ ጎዳቲላይካ ታኒ ታ ኣዋፔ ኤኮ ጎዳቲላ ማላ። 28 ታ ኢዛሰ ዋንታ ቦላ ኬዚዛ ያሊንቴዛ አማና። 29 እያናይ ዋሳ ኬላታሰ ገዛይሳ ሃይሌ ዲዛይ ዉሪ ሲዮ!” ጋዳ ፃፋ ገዴሰ።

\* 2:17 ኬሳ 16:14-15፤ 16:33-34፤ የሃ 6:48-50፤ እሳ 62:2፤ 65:15  
\* 2:20 1ካዎ 16:31፤ 2ካዎ 9:22:30

# 3

## ሳርዴሴ ዋሳ ኬላ

1 ሳርዴሴ ዋሳ ኬላ ከታንቻሰ፡ “ሃይሲ ያሳ አያና ላፑናታፔኔ ያለንቲታ ኦይኪዳዴፌ ዮቴቲዳዳ፡ ታ ኔ ኦሶ ኤራይሰ፡ ኔኒ ሱንላን ፓፃ ዳሳ ሺን ቃሰ ሃይቃዳሳ፡ 2 ቤጋ! ሃይቃና ማቲዳይሳኔ ኔሰ ዉራሼ ጉሐ ኣቲዳ ዋልቃዮ ዛራ ሚንላ፡ ታኒ ታ ጎዳ ሱንላን ኔ ኦሶይ ኩሚሕ ጊዲን ቤያቤኬ፡ 3 ሃሳ ጊሽ ኔኒ ኣይ ማላ ቲሚርቲ ኤኪዳኮኔ ኔ ሲዮይሳ ዩሻ ቆፓኔ ናጋ፡ ማርቴላንካ ጌላ፤ ኔኒ ቤጎንታ ኣጊኮ ቃሰ ታ ካይሶ ማላ ኔ ቆፖንታ ፑቱ ጋና፡ ታ ኣይ ሳቲን ኔኮ ያናኮኔ ኔ ኤራካ፡ \* 4 ጊዶ ኣቲን ባ ማይዖ ቱኒሶንታይቲ ሳርዴሴን ጉላ ኣሳቲ ኔናራ ዳቲሰ፡ ሃይቲ ቦላ ማይዖ ማይዳናይሲ ኢሰታሰ ቤሲዛ ጊሽ ኢሰቲ ቦላ ማይዖ ማይዳዲ ታናራ ባና፡ 5 ያኒዳዴይ ኢሰታላካ ቦላ ማይዖ ማይዳና፡ ኢዛዴ ሱንላ ታኒ ታ ኣዋ ሱንላኒኔ ከታንቻታ ሱንላን ኤሪሳና፡ ዴዖን ዲዛይታ ሱንላ ፃፊቲዳ ዴዖ ማዘጋባፔ ቁጪከ፡ \*

6 “አያናይ ዋሳ ኬላታሰ ጊዛይሳ ሃይላ ዲዛዴይ ሲዮ!

## ፊላዴልፊያ ዋሳ ኬላ

7 ፊላዴልፊያ ዋሳ ኬላ ከታንቻሰ “ሃይሲ ጌሽኔ ቱማንቻ ጊዲዳይሳፊ ዳወቲ ኬላ ቁልፔ ኦይኪዳይሳፊ ዮቴቲዳይሳ፡ ኢዚ ዶዩዳይሳ ኦኒካ ጎርዴና፡ ኢዚ ጎርዲዳዝ ኦኒካ ዶዩና፡ \* 8 ታኒ ኔ ኦሶ ኤራይሰ፤ ሃኮ ኦኒካ ጎርዳናሰ ዳንዳዮንታ ዶያ ፔንጌ ኔ ሱንላን ዋላዲሰ፤ ኔ ዋልቃይ ጉሐ ጊዲዳይሳ ታ ኤራይሰ፤ ጊዲኮካ ኔ ታ ቃላ ናጋዳሳ፤ ታ ሱንላካ ኔ ካዳቤይካ፡ 9 ሃሳ ጊሽ ባሰ ኣይሁዳ ጊደንታ ዲሼ ባና ኣይሁዳ ጊዛይቲ ሃይቲ ፃላዔ ማባራፔ ጊዲዳ ዋርዶቲ ዩዲ ኔ ቶሆ ቦላ ኩንዳና ማላ ታ ኦላና፡ ታኒ ኔና ሲቁዳይሳ ኢሰቲ ኤራና ማላ ታ ኦላና፡ 10 ኔኒ ዳንዳዩዛዴ ጊዳ ጋዳ ታ ኔሰ ዮቶ ቃላ ኔ ናጊዳ ጊሽ ታካ ቡር ቢታ ቦላ ዲዛ ኣሳ ፓጫናሰ ኩሚላ ኣላሚ ቦላ ያና ዋዩዛ ጋላሳፊ ታ ኔና ናጋና፡ 11 ሃኮ ታ ኤሶን ያና፡ ኔ ኣክሊሌ ኦኒካ ኤሶንታ ማላ ኔሰ ዲዛዝ ሎዔላ ኦይካ፡ 12 ያኒዳዴ ታኒ ታ ጎዳ ያሳ ኬላን ቱሰ ኦላና፡ ኢዚ ሃፔ ሙሉካ ኬዜና፡ ታ ጎዳ ሱንላኔ ታ ጎዳ ካታማዛ ሱንላካ ታ ኢዛ ቦላ ፃፋና፡ ሃና ካታማያ ሳሎፔ ታ ጎዳ

\* 3:3 ማቶ 24:43-44፤ ሉቃ 12:39-40፤ ኣጂ. 16:15 \* 3:5 ኪሳ 32:32-33፤ ማዛ 69:28፤ ኣጂ. 20:12፤ ማቶ 10:32፤ ሉቃ 12:8 \* 3:7 ኢሳ 22:22፤ ኢዮ 12:14

ኣቻፌ ዋዳና ኦራላ ዩሩሳላሚ። ታካ ታ ኦራላ ሱንላ ሄ ኢዛዴ ቦላ ፃፋና። \*

13 ኣያናይ ዋሳ ኬላታሰ ዮቲዛይሳ ሃይላ ዲዛዴይ ሲዮ!

**ሎዶቂያ ዋሳ ኬላ**

14 “ሎዶቂያ ዋሳ ኬላ ኪታንቻሰ ‘ሃይሲ ኣሚን’ ገዲይሳፌ ቱሙ ኣማኔቲዳ ማርካ ገዲዳዴፌ ያሳ ሜዴቴላ ዉሪ ኢዛፔ ቤቲዳዴፌ ዮቲቲዳዛ። \* 15 ታኒ ኔ ኦሶ ኤራይሰ። ኔኒ ኢርፃ ዋይኮ ሚሻ ገዳካ። ኔኒ ኢርፃ ዋይኮ ሚሻ ገዲዳኮ ሎዎኮሺን። 16 ኢርፃ ዋይኮ ሚሻ ገደንታ ኔ ጮ ደንቦላ ገዲዳ ገሽ ታ ኔና ታ ዲናፔ ኬሳ ጨታና ጋይሰ። 17 ‘ታ ዲሬኮ፤ ታሰ ዳሮ ሃሮይ ዳሰ፤ ታሰ ኣይኮይካ ፓጨቤና’ ጋሳ ሺን ኔ ቃሰ ገልቃ፤ ኣይኮይ ባይንዳ ሃይሳ፤ ማንቆ፤ ቆቄኔ ኔ ካሎ ዲዛዴ ገዲዳይሳ ኤራቤካ። 18 ኔ ዲሬ ገደና ኮይኮ ታፔ ታማን ፓጨቲዳ ዋርቃ ሻማና ማላ ኔኒ ኔ ካሎቲላ ዩላቲላ ካማናሰ ቦላ ማይዎ ማይዳና ማላ ኔ ጃላናሰካ ዳንዳያና ማላ ኣይፌ ዳሌ ሻማዳ ኔ ቲዩታና ማላ ታ ኔና ዘራይሰ። 19 ታኒ ታ ደሲዛይታ ዉርሳ ሃንቃይሲኔ ቃፃያይሰ፤ ሃሳ ገሽ ኔኒ ሚና፤ ማሮቲላንካ ጌላ። \* 20 ሄኮ! ታኒ ፔንፔን ኤቃዳ ጃይጋይሰ፤ ኦኒካ ታ ቃላ ሲይዲ ባ ፔንፔዛ ታሰ ደዩኮ ታ ኢዛኮ ጌላዳ ኢዛዴራ ማና። ኢዛዴይካ ታናራ ማና። 21 ታኒ ያናዳ ታ ኣዋራ ኢዛ ኣልጋን ኡቲዳይሳሉ ያኒዳዴይ ታናራ ኢሲፌ ታ ኣልጋ ቦላ ታ ኡቲሳና።

22 “ኣያናይ ዋሳ ኬላታሰ ገዛይሳ ሃይላ ዲዛይ ሲዮ!” ጋ ፃፋ ገዴሰ።

**4**

**ሳሎን ዲዛ ጎይኖ ዋጋ**

1 ሃሳፍ ጉዩ ታኒ ሳሎን ደያ ዲዛ ፔንጌ ቤያዲሰ። ታኒ ኮይሮ ሲዩዳይ ዲንኬ ገሪሳ ማላ ገሪሰ “ሃ ፑዴ ኬዛ፣ ቡሮፔ ሃናና ሚሻታ ታ ኔና ቤሳና” ገዴሰ። 2 ታኒ ሄራካ ኣያናን ሊጲጲ ጋዳ ሳሎን ዲዛ ኣልጋ ቤያዲሰ። ሄ ኣልጋዛ ቦላካ ኢሳዴይ ኡቲዴሰ። 3 ሄ ኣልጋ ቦላ ኡቲዳይሳ ሜዳይ ኢያሲጲዴይ ስርዲኖኔ ኢንቁ ሚሳቲዛ ኣልጋዛ ዩዩ ኣጲዲ ማርገዴ ጌቲቲዛ ኢንቁ ሚሳቲዛ ዙላይ ዴሰ። 4 ሃሳላካ ሄ ኣልጋዛ ዩዩ ኣጲዳ ናምዑ ታማኔ ኮይዲ ኣልጋቲ ዴቴሰ። ሄ ኣልጋታ ቦላ ቃሰ ቦላ ማይዎ ማይዲዲ

\* 3:12 ኣጁ 21:2፤ ኣሳ 62:2፤ 65:15 \* 3:14 ለም 8:22 \* 3:19 ለም 3:12፤ ኢብ 12:6

ባ ሁዔ ቦላ ዋርቃ አክሊሌ ዋሊዳ ናምዑ ታማኔ ኦይዱ ጨማቲ ኡቲዳ። 5 ሄ አልጋፌ ቃስ ዋልቃንሴኔ ዳዳ ገሪስ ኬዜስ። ሄ አልጋ ሲንላን ፖሲዛ ላፑን ፆምፔቲ ዳቲስ። ሄይቲካ ፆሳ አያና ላፑናታ። \* 6 ሄ አልጋ ሲንላን ጌሽ ሚልዲ ገዳ ፆልቁዛ ማስቶቲ ሚሳቲዛ አባይ ዳስ። ኢዛ ገደን አልጋ ዩሽን ዳሮ አይፊራ ዲዛ ኦይዱ ደዓቲ ዳቲስ። 7 ኮይሮ ደዓዚ ጋሞ ሚሳቲስ። ናምዓንሶዚ ቃስ ቦራ ሚሳቲስ። ሄቫንሶዛ አይፊሶይ አሳ አይፊሶ ሚሳቲስ። ኦይዳንሶዚ ቃስ ፒራዲዛ ጎሌ ካፎ ሚሳቲስ። 8 ሄ ኦይዱ ደዓቲ ኢሶይ ኢሶይ ኡሱፑን ቁፊራ ዳቲስ። ቁፊታ ዩሽንኔ ቁፊታ ገደን አይፊይ ኩሚዳስ። ኢስቲ ቃማኔ ጋላስ። “ጌሻዉ! ጌሻዉ! ጌሻዉ! ወርሳ ዳንዳዩዛ ጎዶ! ካሴካ ሃሲካ ዲዛይሶ፣ ቡሮካ ያናይሶ ጉሳፌ ሾምፕ ኤሬቲና። \*

9 ሄ ደዓቲ ሄ አልጋ ቦላ ኡቲዳይሳሲኔ ሜርናፔ ሜርና ጋካናስ ዲዛይሳስ ገታቲሉ፣ ቦንቾኔ ጋላታካ ሺሺዛ ዋዳ ኡባን፣ 10 ናምዑ ታማኔ ኦይዱ ጨማቲ ሜርናፔ ሜርና ጋካናስ ዲዛ ባ አልጋ ቦላ ኡቲዳይሳ ሲንላን ጉፓኒዱ ኢዛስ ጎይኔቲስ። ባ አክሊሌታካ ሄ አልጋ ሲንላን ዋሊዳ፣

11 “ኑ ጎዳ ፆሶ፣  
 ኔኒ ወርሳ ሜዲዳ ገሽ  
 ሜዴቲላ ወሪካ  
 ሜዴቲዳይኔ  
 ሾምፖራ ዲዛይ ኔ ሾኔን ገዲዳ ገሽ  
 ገታቲላ፣ ቦንቾይኔ ዋልቃይካ ኔስ ቤሴስ” ገዳ።

# 5

## ደርሳዛኔ ኢዛ ማፃፋ

1 ሄ አልጋ ቦላ ኡቲዳይሳ ኡሻቻ ኩሼ ቃዓ ጋርሳኒኔ ቦላ ባጋራ ፃፊቲ ኡቲዳ ላፑን ማታሚን ጎርዴቲዳ ኢሲ ፃፀቲ ኡቲዳ ማፃፋ ቤያዲስ። 2 ኢሲ ሚኖ ኪታንቻ ዳይሲ ገታ ቃላራ “ሃይታ ማታሚታ ቢርሺዱ ሃ ፃላ ማፃፋ ደያናስ ቤሲዛዴይ ኦኔ?” ገ ሃሳዩሺን ታ ቤያዲስ። 3 ገደ ኣቲን ሳሎንካ ገዲን ዋይኮ ሳዓ ቦላ ዋይኮ ቢታፊ ጋርሳ ባጋንካ ሄ ፃላ ማፃፋ ደዩዲ ኢዛ ገደን ዲዛይሳ ፃላናስ ዳንዳዩዳ አሲ ኦኒካ ቤቲቤና።

\* 4:5 ኬሳ 19:16፤ እጁ 8:5፤ 11:19፤ 16:18፤ ሂዚ 1:13፤ እጁ 1:4፤ ዛካ 4:2  
 \* 4:8 ሂዚ 1:18፤ 10:12፤ ኢሳ 6:2-3



4 ታካ ሄ ፃላ ማፃፋ ቢርሺዲ ኢዛ ገደ ፃላናሰ ቤሲዛዳይ ቤቶንታ ኣገዳ ገሽ ዳር ዩካዲሰ። 5 ሄ ዎዳ ጨማታፔ ኢሳዳይ ታሰ “ኔ ዩኮፋ! ሄኮ ዩሁዳ ባጋ ገዲዳ ዳዉቴ ዛርኬፌ ዳንዲዳ ጋዎይ ኢዚ ካሴ ያኒዳሰ። ኢዚ ሄ ፃላ ማፃፋዛኔ ሄ ላፑን ማታሚዛ ደያናሰ ዳንዳዬሰ” ገዳሰ። \*

6 ሄሳፌ ጉዬ አልጋ ቦላን ኦይዱ ደዓታ ገደን ሄ ጨማታ ገደንካ ሹኬቲዳ ደርሳ ሚሳቲዛይሲ ኤቁዳይሳ ታ ቤያዲሰ። ሄ ደርሳዛሰ ላፑን ካጩይኔ ላፑን ኣይፌይ ዳሰ። ሄ ኣይፌቲካ ኩሚላ ኣላሚ ኪቲቲዳ ያሳ ኣያና ላፑናታ። \* 7 ሄ ደርሳይ ዩዲኔ አልጋ ቦላ ኡቲዳይሳፌ፣ ኡሻቻ ኩሼን ዲዛ ፃላ ማፃፋ ኤኪዳሰ። 8 ሄ ፃላ ማፃፋዛ ኤኪዳ ማላ ኦይዱ ደዓቲኔ ናምዑ ታማኔ ኦይዱ ጨማቲ ሄ ደርሳ ሲንሳን ባ ሊጳን ጉፓኒዳ። ኢሰቲካ ኢሶይ ኢሶይ ባ ኩሼን ዲላ ማላ ሚሽ ኦይኪዳሰ። ሄሳሶካ ጌሻታ ዎሳ ገዲዳ ኢዛን ኤፃኔይ ኩሚዳ ዎርቃ ፃር ባ ኩሼን ኦይኪ ዳቴሰ። \*

9 ኦራላ ዬሰ ሂዘገ ዩፂዳ  
“ኔኒ ኣሳ ዲማ ዲማ ኮቻፌ፣  
ዲማ ዲማ ቃላን ሃሳዩዛይታፔ፣  
ዲማ ዲማ ቆሞፌኔ  
ዲማ ዲማ ዳሬፔ

ያሳሰ ዎዛናሰ ኔ ሹኬቲዳ ገሽ ሄ ፃላ ማፃፋዛ ኤካናሲኔ ማታሚታካ ደያናሰ ቤሲዛዳ ገዳዳሳ። \*

10 ኔ ኢሰታ ኦ ጎዳ ያሳሰ  
ካዎታኔ ቁሴታ ኦላዳሳ።  
ኢሰቲካ ቢታ ቦላ ካዎታና።” \*

11 ታኒ ጌዳ ዛራ ፃሊሺን ሄ አልጋዛ፣ ደዓታኔ ጨማታ ዩዩ ኣጲዳ ዳር ኪታንቻታ ቃላ ገሪሰ ሲያዲሰ። ኢሰታሰ ጮራቴላይ ዳር ሺያኒኔ ዳር ሚሎኔን ቆዳቴሰ። \* 12 ኢሰቲ ዳር ገታ ቃላን “ሃ ሹኬቲዳ ደርሳይ ዎልቃ፣ ዱሬቴሰ፣ ኤራቴሰ፣ ሚኖቴሰ፣ ገታቴሰ፣ ቦንቾኔ ጋላታ ኤካናሰ ቤሴሰ” ገዳ።

13 ሳሎንካ ሳዓ ቦላካ፣ ቢታፌ ጋርሳንካ፣ ኣባ ገደን ዲዛ ሜጴቴላ ኡባን “አልጋ ቦላ ኡቲዳይሳሲኔ ደርሳሰ ጋላታይኔ ጶቃቴሰ፣ ቦንቾይኔ ዎልቃይ ሜርናፔ ሜርና ጋካናሰ ኢዛሰ ገደ!”

\* 5:5 ሜጴ 49:9፤ ኢሳ 11:1፣10 \* 5:6 ኢሳ 53:7፤ ዛካ 4:10 \* 5:8 ማዛ 141:2 \* 5:9 ማዛ 33:3፤ 98:1፤ ኢሳ 42:10 \* 5:10 ኬሳ 19:6፤ እጁ 1:6 \* 5:11 ዳኔ 7:10

ጊሺን ታ ሲያዲስ። 14 ኦይዲ ደባቲካ “አሚን” ጊዳ። ጨማቲካ ባ ሊጸን ጉፋኒዲ ኢዛስ ጎይኒዳ።

# 6

## ላፑን ማታሚታ ደዬቴሰ

1 ሄሳፌ ጉዬካ ሄ ደርሳይ ላፑን ማታሚታ፤ ኮይሮ ማታሚካ ደዬሺን ታ ቤያዲስ። ሄ ኦይዲ ደባታ፤ ኢሶይ ዳዳ ጉጉንላ ማላ ቃላራ “ሃ ያ!” ጊሺን ሲያዲስ። 2 ቃሴካ ቦላ ፓራ ቤያዲስ። ሄ ፓራዛ ቦላ ባ ኩሼን ዋንዳፌ ኦይኪዳይ ደስ። ኢዛስ ቃስ አክሊሌይካ አሜቲዳስ። ኢዚካ ያኒዛዴ ጊዲዲ ያኖፕ ጌዴ ያኖን ባናስ ኬዚዳስ። \*

3 ሄ ደርሳይ ናምባንላ ማታሚካ ደይዳ ማላ ናምባንላ ደባዚ “ሃ ያ!” ጊሺን ታ ሲያዲስ። 4 ቃሴካ ሃራ ያቃ ዘዖ ፓራይ ኬዚዳስ። ሄ ፓራ ቶጊዳይ ቢታ ቦላፌ ሳርቴሰ ዳይሳና ማላኔ አሳይ ባ ጋርሳን ኢሶይ አሳ ዉርሳና ማላ ኦሊሳናስ ኢዛስ ጎዳቴሊኔ ዋጋ ጊታ ማሻይ አሜቲዳስ። \*

5 ደርሳዚ ሄሻንላ ማታሚካ ደዬን ሄሻንላ ደባዚ “ሃ ያ!” ጊሺን ታ ሲያዲስ። ቃሴ ካራላ ፓራ ቤያዲስ። ሄ ፓራ ቦላ ኡቲዳይሲ ባ ኩሼን ማካ ሚሽ ኦይኪዳስ። \* 6 ኦይዲ ደባታ ጊደፌ ዩዳ ሚሳቲካ ቃላ ሲያዲስ፤ ሄ ጊሪሳይካ “ባጋ ኪሎ ጊዲዛ ጊሰቲ አሳዳስ ኢሲ ጋላሳ ዳሞዛ፤ ቃሴ ኢሲ ኪሎ ኩማና ሳይሶ ፓጩ ጊዲዛ ባንጋይ ኢሲ ጋላሳ ዳሞዛ ጊደ። ጊደ አቲን ዛይቲኔ ዋይኔ ሚሰ ቆሆፓ” ጊሺን ታ ሲያዲስ።

7 ሄ ደርሳይ ኦይዳንላ ማታሚካ ደዬን ኦይዳንላ ደባዛ ቃላይ “ሃ ያ!” ጊሺን ሲያዲስ። 8 ቃሴካ ጮሎሎ ፓራ ቤያዲስ። ፓራ ቶጊዳይሳ ሱንላ ሃይቆ ጌቲቲስ። ኢዛ ቃስ ዱፎይ ካሌስ። ሃይቆይኔ ዱፎይ ቢታፌ ሳይሶ ኦላን፣ ጋፋን፣ ቦሻኒኔ ባዘ ደባን ዋዳና ማላ ጎዳቴሊ ኢሰታስ አሜቲዳስ። \*

9 ኢቻሻንላ ማታሚካ ኢዚ ደዬን ያሳ ቃላ ጊሺኔ ባ ማርካቲዳ ማርካቲላ ጊሽ ሃይቁዳይታ ሼምፖታ ያርሾ ያርሽዛሶዛ ጋርሳን ቤያዲስ። 10 ኢሰቲ ቃስ ቃላ ዶቁ ሂሰቲዲ “ጌሻኔ ቲማንቻ ጎዳዉ! ኔኒ ቢታ ቦላ ዲዛ አሳ ቦላ ፐርደንታይኔ ኑ ሱላ ጊሽ ኔ ሃሎ ኬሶንታይ አዬዴ ጋካናሴ?” ጊዲ ዋሲዳ። 11 ኢሰታስ አሳስ

\* 6:2 ዛካ 1:7-8፤ 6:3፥6 \* 6:4 ዛካ 1:7-8፤ 6:2 \* 6:5 ዛካ 6:2፥6 \* 6:8 ሂዚ 14:21

ኢሳስ ቦላ ማይዎይ ኢሜቲዳስ። ኢስታ ማላቲካ ቡሮ ሃይቃና። ኢስታ ማላ ኦሳንቻ ጊዲዳ ኢስታ ላጌቲኔ ኢስታ ኢሻታ ቆዳይ ኩማና ጋካናስ ኢስቲ ጉላ ዎዳስ ሼምፕዲ ታካና ማላ ኢስታስ ዮቴቲዳስ።

12 ሃሳፌ ጉዬ ሄ ደርሳይ ኡሱፑንሶ ማታሜዛ ደዪን ታኒ ጌዴ ኢዛኮ ያላዲስ፤ ሄኮ ቢታይ ዎልቃማ ቃል ቃዲዳስ። እዎ ኦርሼይ ኦሲ ካዮስ ማይዲዛ ካሬላ ማይዎ ማላ ካሬዲዳስ። ኦጊናይካ ኩሜላራ ሱላ ማላ ዘዓዲስ። \* 13 ዎልቃማ ኦሱራ ጫርኮይ ጫርኪዲ ሚላ ኦይፌ ቆቆፊዛ ማላ ሳሎፔ ያሊንቴይ ቆቆፊቲዳስ። \* 14 ሳሎይካ ዋራቃታ ማላ ያፀቲዲ ኪቺዳስ። ዙማቲኔ ኦባ ጊደን ዲዛ ጋዴቲ ዉሪካ ባ ዲዛሶፔ ቆዳቸዳ። \* 15 ቢታ ቦላ ዲዛ ካዎቲ ቢታ ሃሪዛይቲ፣ ኦላ ሃላቃቲ፣ ዲሬቲ፣ ዎልቃማቲ፣ ኦሽካራቲኔ ጎዳቲ ዉሪካ ጎንጎሎ ጊደኒኔ ዙማታ ጋርሳን ዛላታ ጋርሳን ቆቴቲዳ። \* 16 ዙማታኔ ዛላታካ “ኡና ካሚቲ! ኦልጋ ቦላ ኡቲዳይሳ ሲንላፌ፣ ሄ ደርሳዛ ሃንቆፌ ኡና ቆቴቲ። \* 17 ዎልቃማ ሃንቆ ጋላሳይ ጋኪዳስ። ኢዛ ኦኔ ዳንዳያናይ?” ጊዳ። \*

# 7

## ፀታኔ ኦይዲ ታማኔ ኦይዲ ሺ ኦሳ ኦታሚቴላ

1 ሃሳፌ ጉዬ ኦይዲ ኪታንቻታ ቢታ ቦላ ኦይዲ ባጋራ ኤቁዳይታ ቤያዲስ። ኢስቲካ ቢታ ቦላ ጊዲን ዎይኮ ኦባ ቦላ ዎይኮ ሚላ ቦላ ኦይ ጫርኮይካ ጫርኮንታ ማላ ኦይዲ ባጋራ ዪዛ ቦሻ ጫርኮ ዉርሲ ኦይኪዳ። \* 2 ዴዎ ያሳ ማታማ ኦይኪዳ ሃራ ኪታንቻይ እዎ ኦርሼይ ዋኪዛ ባጋራ ሃ ዪሺን ታ ቤያዲስ። ቢታኔ ኦባ ቆሃናስ ኢስታስ ጎዳቴላ ኢሜቲዳ ኦይዲ ኪታንቻታ ባ ቃላ ዶቁ ሂስቲዳ። \* 3 “ኡኒ ኦ ጎዳ ኦሳንቻታ ሊጴ ቦላ ማታሜ ዎላና ጋካናስ ቢታ ቦላ ጊዲን ዎይኮ ኦባ ጊደን ዲዛይታ ጊዲን ዎይኮ ሚላታ ጊዲንካ ሄይታንታ ቆሆፕቴ” ጊ ዋሲዳስ። \*

\* 6:12 እጁ 11:13፤ 16:18፤ ኢሳ 13:10፤ ኢዩ 2:10፣31፤ 3:15፤ ማቶ 24:29፤ ማር 13:24-25፤ ሉቃ 21:25 \* 6:13 ኢሳ 34:4 \* 6:14 እጁ 16:20 \* 6:15 ኢሳ 2:19፣21 \* 6:16 ሆሴ 10:8፤ ሉቃ 23:30 \* 6:17 ኢዩ 2:11፤ ሚል 3:2 \* 7:1 ኤር 49:36፤ ዳኔ 7:2፤ ዛካ 6:5 \* 7:3 ሂዚ 9:4-6

4 ታካ ማታሚይ ኢስታ ቦላ ዋዲዳይታ ቆዳ ሲያዲስ።  
 ኢስራዔል አሳ ኮቻ ኡባፌ ማታሚይ ኢስታ ቦላ ሾጩቲዳይታ  
 ቆዳይ ዪታኔ ኦይዱ ታማኔ ኦይዱ ሺ አሳ። 5 የሁዳ ቆሞፌ  
 ማታሚይ ኢስታ ቦላ ሾጩቲዳይቲ፣ ታማኔ ናሞዑ ሺ፣  
 ርቤሌ ቆሞፌ ታማኔ ናሞዑ ሺ፣  
 ጋዴ ቆሞፌ ታማኔ ናሞዑ ሺ፣  
 6 አሴሬ ቆሞፌ ታማኔ ናሞዑ ሺ፣  
 ኒፍታሎሜ ቆሞፌ ታማኔ ናሞዑ ሺ፣  
 ሚናሴ ቆሞፌ ታማኔ ናሞዑ ሺ፣  
 7 ሲሞና ቆሞፌ ታማኔ ናሞዑ ሺ፣  
 ሌዌ ቆሞፌ ታማኔ ናሞዑ ሺ፣  
 ዩሳኮሬ ቆሞፌ ታማኔ ናሞዑ ሺ፣  
 8 ዛቢሎኔ ቆሞፌ ታማኔ ናሞዑ ሺ፣  
 ዮሴፌ ቆሞፌ ታማኔ ናሞዑ ሺ፣  
 ቢኒያሚ ቆሞፌ ታማኔ ናሞዑ ሺ።

**ቦላ ማይያ ማይዒዳ ዳር ዴሬ**

9 ሃሳፌ ገዬ ታ ያለሺን ቆዳይ ባይንዳ ዳር ዴሬይ ዲዛይሳ  
 ቤያዲስ። ሄይታንቲካ ዴሬፔ፣ ዲማ ዲማ ቆሞፌ፣ ዲማ ዲማ  
 ዛርኬፌኔ ዲማ ዲማ ቃላ ሃሳዩዛይታፔ ሺቄቲዳይታ። ሄይቲ  
 ዉሪ ቦላ ማይያ ማይዒዳ ዛሞባ ሃይላ ባ ኩሺን ኦይኪዲ አልጋ  
 ሲንሳኒኔ ዶርሳዛ ሲንሳን ኤቄዳ። 10 ቃላ ቆቁ ሂስቲዲ “አቶቴላ  
 አልጋ ቦላ ኡቲዳ ኑ ጎዳፔኔ ዶርሳዛፔኮ!” ገዳ።

11 ኢዛ ኪታንቻቲ ዉሪካ ኢዛ አልጋስ፣ ጨማታኔ ኦይዱ ደዓታ  
 ዩይ አዲ ኤቄዳ አልጋዛ ሲንሳን ጉፋኒዲ ያሳሰ ጎይኒዳ።

12 “አሚን! ሳባይ፣ ገታቴላ፣  
 ኤራቴላ፣ ጋላታይ፣ ቦንቾይ፣  
 ዋልቃይኔ ሚኖቴላ ኑ ጎዳሰ ያሳሰ  
 ሚርናፔ ሚርናሰ ገዳ። አሚን!” ገዳ።

13 ጨማታ ገዳፌ አሳይይ ታኮ ሲሚዲ ታና “ሃይቲ ቦላ ማይያ  
 ማይዒዳይቲ ኦናንቲ? ኢስቲ አዋፔ ዩዳይቲ?” ገዳስ።

14 ታካ “ጎዳዉ! ኔ ኤራሳ” ገዳስ። ኢዛካ ታሰ “ሃይቲ  
 ዋልቃማ ዋይዛ ካንሊዲ ዩዳይታ። ኢስቲ ባ ማዮካ ዶርሳ ሱሳን  
 ሜጪ ጌሺዳ። \* 15 ሃሳ ገሽ ያሳ አልጋ ሲንሳን ዴዒዲ ቃማኔ  
 ጋላሰ ኢዛ ኬሳን ኢዛሰ ኦሌቴስ። አልጋ ቦላ ኡቲዳይሲ ባ ቦንቾራ

\* 7:14 ዳኔ 12:1፤ ማቶ 24:21፤ ማር 13:19

ቤተዲ ኢስታስ ኩዋሶ ገዳና። 16 ሃይሳፌ ጉዬ ኢስቲ ጋፌቴና፣ ሳሞቴቴና፤ አዋ አርሼ ሴላይካ ኢስታ ቦቹና፤ ሆሞቤይካ ኢስታ ሆሞቤና። \* 17 አልጋዛስ ገደ አዳን ኡቲዳ ዶርሳይ ኢስታ ሄሚዛዳ ገዳና። ኢስታካ ጌዴ ዳፆ ሃላ ፑልቶይ ዲዛሶ ካሌላና። ያሲ ኢስታ አይፌፔ አፋንላ ቁጫና። ገዴስ። \*

# 8

## ላፑንላ ማታሚ ዶዬቴላ

1 ዶርሳይ ላፑንላ ማታሚ ዶዬን ባጋ ሳቲ ገዲዛይሳ ኬና ሳሎይ ጮፀ ገዴስ። 2 ያሳ ሲንላን ኤቁዛ ላፑን ኪታንቻታ ታኒ ቤያዲስ። ሄ አሳታሰካ ላፑን ዲንኬይ ኢሜቴዴስ።

3 ኤፃኔ ኢዛን ጨዋሲዛ ዋርቃፍ ኦሴቲዳይሳ ኦይኪዳ ኪታንቻይ ዪዲ ያርሾ ኢዛን ያርሺዛሶዛ አቻን ኤቁዴስ። አልጋ ሲንላን ዲዛ ዋርቃፌ ኦሴቲዳ ያርሾ ኢዛ ቦላ ያርሺዛይሳ ቦላ ጌሻታ ዋሳራ ኢሲፌ ሺሺዛ ዳር ኤፃኔይ ኢዛስ ኢሜቴዴስ። \*

4 ሄ ኤፃኔዛ ጨዋይ ያሳስ ዲማቲዳ አሳታ ዋሳስ ሄ ኪታንቻ ኩሼፔ ፑዴ ያሳ ሲንላ ኬዚዴስ። 5 ሄሳፌ ጉዬ ኪታንቻዚ ኤፃኔ ኢዛን ጨዋሲዛይሳ ኦይኪዲ ያርሾ ያርሺዛሶዛፔ ታማ ኤኪ ኢዛን ኩንላዲ ዲጌ ቢታ ቦላ ዩገዴስ። ዳዳይ ዳዳቲዴስ፤ ገርሲ ገርዴስ፤ ዋልቃንላ ዋልቃሚዴስ፤ ቢታይካ ቃዲዴስ። \*

## ዛዬይ ፑኔቲዴስ

6 ላፑን ዛዬ ኦይኪዳ ላፑን ኪታንቻቲ ባ ዛዬ ፑናናስ ገጌቲዳ።

7 ኮይር ኪታንቻዚ ባ ዛዬዛ ፑኒዴስ፤ ሻቹኔ ሱላ ዋላኬቲዳ ታማይ ሜዴቲዲ ዲጌ ቢታ ቦላ ዩጌቲዴስ፤ ቢታፌ ጨጎይ ፀጌቲዴስ፤ ሚላፌካ ጨጎይ ፀጌቲዴስ፤ ጨሊላ ማታይካ ዉሪ ፀጌቲዴስ። \*

8 ናሞዓንላ ኪታንቻይካ ባ ዛዬዛ ፑኒዴስ፤ ኢሲ ገታ ዙማ ሚሳቲዛ ሚሺ ኤፃሼ ዲጌ አባ ገደ ዩጌቲዴስ፤ አባስ ጨጎይ ሱላ ገዲዴስ። 9 አባ ገደን ሽምፖራ ዲዛ ሜዴቴላፌ ጨጎይ ዉሪ ሃይቁዴስ። ማርካቤታፔካ ጨጎይ ኩሜላ ቆዩዴስ።

\* 7:16 ኢሳ 49:10 \* 7:17 ማዛ 23:1፤ ሂዚ 34:23፤ ማዛ 23:2፤ ኢሳ 49:10፤ ኢሳ 25:8 \* 8:3 አዋ 9:1፤ ኬሳ 30:1፣3 \* 8:5 ለዌ 16:12፤ ሂዚ 10:2፤ ኬሳ 19:16፤ እጁ 11:19፤ 16:18 \* 8:7 ኬሳ 9:23-25፤ ሂዚ 38:22

10 ሄሸንጎሎ ኪታንቻዚ ባ ዛዬዛ ፑኒዳስ። ያሞፔ ማላ ኤደዛ ኢሲ ጌታ ያለንቲይ ሳሎፔ ደጌ ኩንዲዳስ። ኢዚ ኩንዲዳይ ሻፋታ ጨጎ ቦላኔ ሃላ ፑልቶታ ጨጎ ቦላ። \* 11 ሄ ያለንቲዛ ሱንሳይ ጫሞ ጌቲቲስ፤ ሃሳስ ጨጎይ ጫሞ ጌዲዳስ፤ ሄ ጫሞ ሃላ ጋሶን ዳር ዳሬይ ሃይቂዳስ። \*

12 ኦይዳንጎሎ ኪታንቻይ ባ ዛዬዛ ፑኒዳስ፤ ኣዋ ኣርሼስ ጨጎይ፣ ኣገናስ ጨጎይ፣ ያለንቲታስ ጨጎይ ሾጩቲዳስ፤ ሄሳ ገሸ ሄይታንታ ፖፖፔ ጨጎይ ጳሚዳስ፤ ሄሳ ማላንካ ጋላሳፌ ጨጎይ ኦማርስ ጌዲዳስ። ሄሳሎካ ኦማርሳፔ ጨጎይ ፖፖይ ባይንዳ ጳማ ጌዲዳስ። \*

13 ታ ቃስ ዛሪ ያሊሺን ኢሲ ጎሌ ካፎይ ሳሎ ቦላ ፒራዲሽ ጌታ ቃላን “ሃንኮ ኣቲዳ ሄሸ- ኪታንቻቲ ባ ዲንኬታ ጌሪስ ሲሲዛ ዋዳ ቢታ ቦላ ዲዛ ኣሳስ ኣዬ-ኣና! ኣዬ-ኣና! ኣዬ-ኣና!” ገሺን ሲያዲስ።

# 9

1 ኢቻሻንጎሎ ኪታንቻይ ባ ዛዬዛ ፑኒዳስ። ታ ቃስ ሳሎፔ ካሴ ደጌ ቢታ ቦላ ኩንዲዳ ያለንቲዛ ቤያዲስ። ኢዛስ ቃስ ጨማ ኦላ ደዩዛ ቁልፔይ ኢሜቲዳስ። 2 ኢዚካ ሄ ጨማ ኦላዛ ደዩዳስ። ሄ ጨማ ኦላፔ ዋልቃማ ታማ ጩሞ ማላ ጩሞይ ኬዚዳስ። ሄ ኦላፌ ኬዚዳ ጩሞዛ ጌደን ኣዋ ኣርሼይኔ ሳሎይ ጳሚዳስ። \*

3 ሄ ጩሞፔ ቢታ ቦላ ቦሌይ ኬዚዳስ። ቢታ ቦላ ዲዛ ማስማሶታስ ዲዛ ዋልቃ ማላ ዋልቃይ ኢስታስ ኢሜቲዳስ። \*

4 ቢታ ቦላ ዲዛ ማታ ጌዲን ዋይኮ ኣይ ሚሺካ ሃራ ጨለላ ሚሽ ሞንታ ማላ ዋይኮ ኣይ ሚሴካ ቆሆንታ ማላ ኢስታስ ዮቲቲዳስ። ኢስቲ ቆሃና ቤሲዛይ ቃስ ሊጴ ቦላ ያሳ ማታሚይ ባይንዳ ኣሳታ ያላላ ገዳና ማላ። \* 5 ሄ ኢስታካ ኢቻሹ ኣገና ጋካናስ ዋዬ ያላላ ዋዩሳና ኣቲን ዋዶ ዋዳና ማላ ፒቃይይ ኢስታስ ኢሜቲቤና። ሄ ቦሌቲ ኣሳ ቦላ ጋሊዛ ዋዬዚ ማስማሶይ ኣስ ደኪኮ ኣስ ሴሊዛ ሴላ ማላ። 6 ሄ ጋላሳታን ኣሳይ ሃይቃና ኮያና ሺን ሃይቆ ዳሜና። ሃይቃናስ ኣሞታና ሺን ሃይቆይ ኢስታፌ ባቃታና። \*

\* 8:10 ኢሳ 14:12 \* 8:11 ኤር 9:15 \* 8:12 ኢሳ 13:10፤ ሂዚ 32:7፤ ኢዩ 2:10፣31፤ 3:15 \* 9:2 ሜዴ 19:28 \* 9:3 ኬሳ 10:12-15 \* 9:4 ሂዚ 9:4 \* 9:6 ኢዩ 3:21፤ ኤር 8:3

7 ቦሌቲ ቃስ ኦላስ ጊጌቲዳ ፓራታ ሚሳቴቴስ፤ ኢስታስ ሁዔ ቦላ ዋርቃ ኣክሊሊ ሚሳቴዛ ሚሺ ዳስ። ኢስታ ኣይፊሶይ ኣሳ ኣይፊሶ ሚሳቴስ። \* 8 ኢስታ ሁዔ ኢሊኬይ ማጫሳ ሁዔ ኢሲኬ ሚሳቴስ፤ ኢስታ ኣቼይ ቃስ ጋሞ ኣቼ ሚሳቴስ። \* 9 ቢራታፔ ኦሴቲዳ ፀሩሬ ጌቲቲዛ ማይያ ማላ ቲራ ቦላ ማይዒዛ ማይያይ ኢስታስ ዳስ፤ ኢስታ ቁፊይ ጊሪዛ ጊሪሳይ ኦላስ ቶጌቲዛ ዳሮ ፓራኔ ፓራ-ጋሬታ ጊሪሳ ማላ ጊሬስ። \* 10 ኢስታስ ማሲማሶ ጎይና ማላይኔ ዱኪዛሶይ ዳስ። ኢስታስ ጎይና ጊዶን ኢቻቩ ኣገና ጋካናስ ኣስ ቆሂዛ ዋልቃይ ዳስ። 11 ካዎይካ ኢስታስ ዳስ። ሄ ኢዛካ ጨማ ኦላ ኪታንቻዛ። ኢዛ ሱንሳይካ ኢብራዊታ ቃላራ “ኣባዶኔ” ጌቲቴስ። ቃሴ ጊሪኬ ቃላራ “ኣጲሊዮኔ” ጌቲቴስ። ሄሳ ጉሲካ ፒቲ ቆይሲዛይሳ ጉሳ። \*

12 ኮይሮ ሂርጊሶ ዋሶይ ኣጲዳስ። ሄሳፌ ቃስ ሃራ ናምዑ ዋሶይ ቡሮ ያና።

13 ኡሱፑንሳ ኪታንቻይካ ባ ዛዬዛ ፑኒዳስ። ሄኮ! ያሳ ሲንሳን ዲዛ ዋርቃፌ ኦሴቲዳ ያርሾ ያርሺዛሶዛን ዲዛ ካጩታ ጊዶፌ ጊሪስ ሲያዲስ። \* 14 ሄ ጊሪሳይካ ዲንኬ ኦይኪዳ ኡሱፑንሳ ኪታንቻዛ “ዋጋ ሻፋን ኤፊራዲሴን ቃሹቲ ዲዛ ኦይዱ ኪታንቻታ ቢርሻ ዬዳ” ጊዳስ። 15 ሃይሳ ሃ ሳቴዛሲኔ ሃ ጋላሳስ። ሃ ኣገናሲኔ ሃ ላይሳስ ጊጌቲዳ ኦይዱ ኪታንቻቲ ኣሳ ዜሬላፌ ጨጎ ባጋ ዋቆና ማላ ቢርሹቲዳ። 16 ሄ ፓራን ኦሊዛ ኣሳታ ጮራቴላይ ዪታታን ቆይቲዛ ሚሎኔ ጊዲዳይሳ ታኒ ሲያዲስ።

17 ፓራቲኔ ሄ ፓራታ ቶጊዳ ኣሳታ ታኒ ኣጁታን ቤዱዳይቲ ሃይሳፌ ካሊዛይሳ ማላኮ! ኢስታስ ቲራ ቦላ ዲዛ ፀሩሬዚ ታማ ቦንቆ ማላ ዞያ፤ ሳሎ ማላ ካሬሴኔ ጋላልያ ሚሳቴስ። ፓራታ ሁዔይ ጋሞ ሁዔ ሚሳቴስ። ኢስታ ዲናፔ ታማይኔ ጨዋይ ዲኔ ጌቲቲዛ ሚሺ ኬዜስ። 18 ኢስቲ ባ ዲናፔ ኬሲዳ ታማይ ጨዋይኔ ዲኔይ ሃ ሄሹ ቦቻታን ኣሳ ዜሬላፌ ጨጎይ ሃይቂዳስ። 19 ሄ ፓራታ ዋልቃይ ኢስታስ ዲና ጊዶኒኔ ጎይና ቦላ ዳስ። ኢስታ ጎይናይ ሾሽ ሚሳቴስ። ኢዛስ ሾሻ ሁዔይካ ዳስ። ኢስቲ ኣሴ ሄሳን ቆሂቴስ።

20 ሃይታ ሃ ቦቻታን ሃይቆፔ ኣቲዳ ኣሳ ዜሬላቲ ካሴ ባ ኦሊዳ ኢታ ኦሶፔ ሲሚዲ ማርቴላን ጌሊቤይቴና። ዳይዳንሳስ

---

\* 9:7 ኢዩ 2:4 \* 9:8 ኢዩ 1:6 \* 9:9 ኢዩ 2:5 \* 9:11 ኣባዶኔ፣ ኣባዶኔይ ጊሪኬ ቃላራ “ኣጲሊዮኔ” ጌቲቴስ፤ ቢርሹላይካ “ፒቲ ቆይሳ” ጉሳ \* 9:13 ኬሳ 30:1-3

ዋርቃፌ፡ ቢራፔ፡ ፃርቀማላፔ፡ ሹቻፌ፡ ሚላፌ፡ ኦሴቲዳ ፃላናሰ  
ዋይኮ ሃይላን ሲያናሰ ዋይኮ ሃሙታናሰ ዳንዳዮንታ ኤቃታሰ ጎይኖ  
አጊቤይቲና። \* 21 ሃሳሶካ ሹምፖ ዋጶፔ፡ ቢታፔ፡ ላይማፌኔ  
ካይሶቴላፌ ሲሚዲ ማርቴላን ጌሊቤይቲና።

# 10

## ኪታንቻኔ ያሳ ማፃፋ ጉላዮ

1 ሃሳፌ ጉዬ ሻራ ማይዲዳ ሃራ ሚኖ ኪታንቻይ ሳሎፔ  
ዲጌ ዋጲዛይሳ ቤያዲሰ፤ ዙላይ ኢዛ ሁዔ ዩይ አጲዳሰ።  
ኢዛ አይፌሶይ አዋ ኦርሼ ሚሳቴሰ። ኢዛ ቶሆቲካ ታማ ቱሰ  
ሚሳቴቴሰ። 2 ፃላፌ ቢርሼቲዳ ኢሲ ጉላ ማፃፋ ዲዛር ባ ኩሼን  
ኦይኪ ኡቲዳሰ። ኢዚ ባ ኡሻቻ ቶሆዛን አባ ሃዲሪሳ ቶሆዛን  
ቃሰ ቢታ ዩጲ ኤቁዳሰ። 3 ጋሞ ፃጎ ማላ ጊታ ቃላራ ፃጊዳሰ።  
ኢዚ ፃጊዳ ማላ ላፑን ዳዳቲ ባ ጊሪሳ ሲሲዳ።

4 ላፑን ዳዳቲ ባ ጊሪሳ ሲሲዳ ማላ ታ ፃፋና ጋዳ ቆፓዲሰ  
ሺን “ሃ ላፑን ዳዳቲ ዮቶይሳ ቁምዓ ዋላ ኣቲን ፃፎፓ!” ጊዛ  
ቃላ ሳሎፔ ሲያዲሰ።

5 ሃሳፌ ካሊዲ አባ ቦላኔ ቢታ ቦላ ኤቁ ዲሺን ታ ቤዪዳ  
ኪታንቻዚ ባ ኡሻቻ ኩሼ ፑዳ ሳሎ ዳንሊዲ። 6 ሜርናፔ ሜርናሰ  
ዲዛይሳን ሳሎኔ ሳሎን ዲዛይታ ቃሴካ ቢታኔ ቢታ ጋርሳን  
ዲዛይታ፡ አባኔ አባ ጊደን ዲዛይታ ሜጲዳ ያሳ ሱንሐ ፃይጊ  
ጫቁዲ “ሃይሳፌ ጉዬ ኢዚ ጋምዔና! 7 ጊደ ኣቲን ላፑንላ  
ኪታንቻይ ባ ዛዬዛ ፑኒ ሲሲዛ ጋላሳታን ኢዚ ባ ኦሳንቻታሰኔ  
ናቤታሰ ኤሪሲዳ ማላ ያሳ ፀራይ ፖሌታና” ጊዳሰ። 8 ሃሳፌ ጉዬ  
ታኒ ሳሎፔ ሲዪዳ ቃላይ “አባ ቦላኔ ቢታ ቦላ ኤቁዳ ኪታንቻ  
ኩሼን ደዌቲ ዲዛ ፃላ ማፃፋዛ ባዳ ኤካ!” ጊዲ ቃሴካ ታሰ  
ዮቲዳሰ።

9 ታኒ ቃሰ ኪታንቻዛኮ ባዳ “ሂኖ ቁሪ ፃላን ዲዛ ማፃፋዮ ታሰ  
አማ” ጋዲሰ። ኢዚካ “ሂይ ኤካዳ ማ! ኢዛ ኔና ኔ ኡሎ ጊደን  
ጫማና ሺን ዲናን ቃሴ ኔና ኤሳ ማላ ማልዓና” ጊዳሰ።

10 ታካ ሄ ቁሪ ፃላ ማፃፋዮ ኪታንቻዛ ኩሼፔ ኤካዳ ማዲሰ።  
ኢዛካ ታ ዲናን ታና ኤሳ ማላ ማልዓዲሰ ሺን ታ ማዳ አጊን  
ጉዬፔ ታ ኡሎ ጊደን ታና ጫማዲሰ። 11 ሃሳፌ ቃሴ “ዳር ዲማ  
ዲማ ቆሞ አሳ ጊሽ ዲማ ዲማ ቃላን ሃሳዪዛ አሳታ ጊሽኔ ካዎታ

\* 9:20 ማዛ 115:4-7፤ 135:15-17፤ ዳኔ 5:23



ጊሽ ቃሴካ ቲንቢቴ ኔ የታና ማላ ኔስ ቤሴስ” ጌቴቲዲ ታስ የቴቲዴስ።

# 11

## ናምዑ ማርካታ

1 ሃሳፌ ጉዬ ታ ኢዛራ ዋቆ ዋቆስ ጉፌ ሚሳቲዛ ሾምቦቆይ ታስ ኢሜቲዴስ። ታስ ሂዘጌቴዴስ “ኔኒ ዴንዳዳ ያሳ ኬፋዛኔ ጊዶ ኪፊሌታ ዋቆ! ሄን ጎይኒዛያታ ታይባ። \* 2 ያሳ ዋሳ ኬፋፌ ካሬራ ጮ ዲዛሶዛ አጋጋ። ሄሲ አይዛቤታስ ኢሜቲዳሶ ጊዲዳ ጊሽ ኔ ኢዛ ዋቆፋ። አይዛቤቴ ጌሻ ካታማዮ አይዲ ታማኔ ናምዑ አገና ጋካናስ ዬቋ ሃራና። \* 3 ታ ማርካ ናምዳቲ ካዮ ማይዖ ማይዲዲ ኢሲ ሺያኔ ናምዑ ያታኔ ኡሱፑን ታሙ። ጋላስ ጋካናስ ቲንቢቴ የታና ማላ ታ ኢስታስ ዋልቃ ኢማና።”

4 ሄይቲ ቢታ ጎዳ ሲንፋን ኤቁዛ ናምዑ ዋጋራ ሚፋቲኔ ኢስታ ቦላ ያምፔ ዋልዛ ናምዑ ባላታ። \* 5 ኦኒካ ኢስታ ቆሃናስ ኮይኮ ኢስታ ዲናፕ ታማይ ኬዚዲ ኢስታ ሞርኬታ ፀጋና። ኢስታ ቆሃና ኮዪዛዴንቲ ወሪ ሃይቃናይ ሃሳ ማላና። \* 6 ኢስቲ ቲንቢቴ የቲዛ ሄ ጋላሳታን ኢራይ ቡኮንታ ማላ ሳሎ ጎርዳናስ ማታይ ኢስታስ ዴስ። ሃሳሶካ ሃፋታ ሱፋን ላማናስ ኮይኮካ ሃራ አይ ማላ ቦሻንካ ቢታ ሾጫናስ ዋልቃይ ኢስታስ ዴስ። \*

7 ኢስቲ ባ ማርካቴፋ ወርሲዳፔ ጉዬ ሂርኪ ጨማ ኦላፌ ኬዚዛ ደዳይ ኢስታራ ኦሌቲዲ ኢስታ ያናናኔ ዋቆና። \*

8 ኢስታ አሃይ ለሚሶራ ሶዶሜኔ ጊብፄ ጌቴቲዛ ጊታ ካታማይን ጮ ዴንባን ዘንግና። ሂና ካታማያ ካሴ ኢስታ ጎዳይ ኢዚን ካቁቲዳሶዮ። \* 9 ዲማ ዲማ ቆሞቲኔ ዲማ ዲማ ዛርኬቲ፣ ዲማ ዲማ ቃላን ሃሳዪዛይቲኔ ዴሬቲ ሄቹ ጋላሲኔ ባጋ ጋካናስ ኢስታ አሃ ያላናኔ ሄ ኢስታ አሃይ ሞጌቶንታ ማላ ዲጋና። \* 10 ሄይቲ ናምዑ ናቤቲ ካሴ ቢታ ቦላ ዲዛ አሳ ዋይሲዳ ጊሽ ሃዲ ቃስ ቢታ ቦላ ዲዛ አሳይ ሃ ናቤቲ ሃይቁዳ ጊሽ ኡፋዬታና። ሄ ኡፋይሳስ ባዓሌ ኦሊዲ ኢሶይ አሳስ ዬስ ኢማና። \* 11 ጊዶ አቲን ሄቹ ጋላሲኔ ባጋይ አቋዳፔ ጉዬ ኢስታስ ሾምፖ አሚዛ ፔናይ ያሳ አቻፌ ዪዲ ኢስታ አሃን ጌሊዴስ። ኢስቲካ ባ ቶሆን ኤቁዳ ኢስታ ቤዪዳ አሳይ ዳር

\* 11:1 ሂዘ 40:3፤ ዛካ 2:1-2 \* 11:2 ሉቃ 21:24 \* 11:4 ዛካ 4:3፤11-14 \* 11:6 2ካዎ 17:1፤ ኬሳ 7:17-19፤ 1ሳሜ 4:8 \* 11:7 ዳኔ 7:7፤21፤ እጃ 13:5-7፤ 17:8 \* 11:8 ኢሳ 1:9-10

ባቢዳስ፡ \* 12 ሄሳፌ ጉዬ ሄ ናምዑ ናቤቴ “ሃ ፑዳ ኬዚቴ!” ጊዛ ቃላ ሳሎፕ ሲዱዳ፡ ኢስታ ሞርኬቴ ኢስታ ያሊሺን ኢስቲ ሻራራ ፑዳ ሳሎ ኬዚዳ፡ \* 13 ሄ ሳቴዪንካ ዎልቃማ ቢታ ቃሊ ሃንዳስ፡ ሄ ካታማስ ታማፌ ኢሲ ኩሺይ ላሌቴዳስ፡ ቢታ ቃላ ጋሶን ላፑን ሺ ዳሬይ ሃይቂዳስ፡ ሃይቆንታ ኣቴዳ ኣሳይ ቃስ ዳር ባቢዳሲኔ ሳሎ ያሳካ ቦንቺዳስ፡ \*

14 እዬ ኣና! ጊዛ ቃላ ናምዓንጾዚ ኣጂን ሄቫንጾዛ ዋሶይ ኤሶን ጋካና፡

**ላፑንጾ ዛዬ**

15 ላፑንጾ ከታንቻይካ ባ ዛዬዛ ፑኒዳስ፡ ሳሎን ቃስ “ኣላሚ ካዎቴሊ ኑ ጎዳ ያሳሲኔ ከርስቶሳስ ጊዳዳስ፡ ኢዚካ ሜርናፔ ሜርና ጋካናስ ካዎታና” ጊዛ ጊታ ቃላይ ሲዬቴዳስ፡ \* 16 ያሳ ሲንሳን ባ ኣልጋ ኣልጋ ቦላ ኡቴዳ ናምዑ ታማኔ ኦይዱ ጨማቴካ ባ ሊጶን ጉፋኒዱ ያሳስ ጎይኒዳ፡ 17 ቃሴካ

“ካሴካ፣ ሃዒካ ዲዛይሶ!  
ኡባካ ዳንዳዪዛ ጎዳ ያሶ!  
ኔኒ ኔ ጊታ ጎዳቴላ ኔ ኩሺን ኦይኪዳ ጊሺኔ  
ካዎቴዳ ጊሽ ኦይ ኔና ጋላቶስ፡

18 ኣይዛቤይ ሃንቁቴዳስ፤  
ካሴ ሃይቂዳይቴ ፐርዳ ዳሚዛ ዎዳይ ጋኪዳስ፤  
ካሴ ኔ ኦሳንቻታ ናቤታሲኔ  
ጌሻታስ ኔ ሱንሳካ ቦንቺዛይታስ፤  
ጉላታሲኔ ጊታታስ፤  
ኔኒ ኢስታስ ኢስታ ዎጋ ኢሚዛ ዎዳይ ሃዒ ጋኪዳስ፡  
ቢታ ጳይሲዳይታ ኔ ጳይሳናስ ዎዳይ ጋኪዳስ” ጊዳ፡

19 ሳሎን ዲዛ ያሳ ኬላ ጊዶ ከፊሌይ ዶዬቴዳስ፡ ኢዛ ጫቆ ታቦታዚካ ሄን ያሳ ኬላስ ጊዶ ከፊሌን ቤቴዳስ፡ ዎልቃንጻ ዎልቃሚዳስ፤ ገርሲ ገርዳስ፤ ዳዳይ ዳዳቴዳስ፤ ቢታ ቃሊኔ ዎልቃማ ሻቺ ቡኪዳስ፡ \*

**12**

**ማጫሳዮኔ ዳዌ ሸሻ**

---

\* 11:11 ሃዚ 37:10 \* 11:12 2ካዎ 2:11 \* 11:13 እጁ 6:12፤ 16:18  
\* 11:15 ኬሳ 15:18፤ ዳኔ 2:44፤ 7:14፤27 \* 11:19 እጁ 8:5፤ 16:21

1 ሄሳፌ ጉዬ ገታ ማላሊሲዛ ማላታይ ቦላ ሳሎ ቦላ ቤተዳሰ። ኢሲ ማጫሲያ ኣዋ ኣርሼ ማይዳዳ፣ ኣገና ባ ቶሆን ዬቆዳ ታማኔ ናምዑ ያለንቲታ ኣክሊሌ ማላ ባ ሁዔን ዋላዳ ቤታዲሰ። 2 ኢዛካ ሻራራ ዳዉሰ። ዬሎ ሚፃይ ኢዞ ኦይኪን ሚቶታዳ ዋሳዲሰ።

3 ሄሳሶካ ሃራ ማላታይ ሳሎ ቦላ ቤተዳሰ። ኢዛሰ ላቸን ሁዔይኔ ታሙ ካጩቲ ዲዛ ኢሲ ገታ ዳዌይ ቤተዳሰ። ኢዛ ሁዔታ ቦላካ ላቸን ዛዉዳቲ ዳቲሰ። \* 4 ኢዚ ባ ሳይናራ ሳሎ ያለንቲታፕ ጨጎ ገዲዛይታ ሳሎፕ ዲጌ ቢታን ዬገደሰ። ሄ ማጫሳያ ዬሊሺን ኢዛ ዬሊዛ ናዛ ሚታናሰ ቆፕዲ ዳዌዚ ሄ ዬላናሰ ማቲዳ ማጫሳይሰ ሲንሳን ኤቂዳሰ። \*

5 ማጫሳያካ ካሴ ዳሬታ ኡባ ቢራታ ጉፌራ ሃሪዛ ኣቲማ ና ዬላዲሰ ሺን ናዚ ቃሰ ፑዳ ያሳኮኔ ያሳ ኣልጋኮ ኤኬቲዳሰ። \*

6 ማጫሳያካ ዲጌ ባዞ ቢታ ቤታዲሰ። ሄ ባዳ ኢሲ ሺያኔ ናምዑ ፃታኔ ኡሱቸን ታሙ ጋላሰ ጋካናሰ ቦንቸን ዳናሶ ያሲ ካሴ ኢዚሰ ገጊሰ ዋሊዳሰ።

7 ሳሎ ቦላ ኦላይ ዳንዲዳሰ። ሚካሌይኔ ኢዛ ኪታንቻቲ ዳዌዛራ ኦሌቲዳ። ዳዌዚኔ ኢዛ ኪታንቻቲካ ዛሪዲ ሚካሌራኔ ኢዛ ኪታንቻታራ ኦሌቲዳ። \* 8 ገደ ኣቲን ዳዌዚኔ ኢዛ ኪታንቻቲ ያኔቲዳ። ሄሳፌ ጉዬ ኢሰታሰ ሳሎን ዳናሶይ ቤቲቤና። 9 ሄ ገታ ዳዌዚ ዲጌ ዬጌቲዳሰ። ኢዚካ ኩሚሳ ኣላሚዛ ባሌሊዛ ደቡሎሳ ዋይኮ ያላዔ ጌቲቲ ፃይጌቲዛ ቤኒ ዋዳ ሾሻዛ። ኢዚ ቃሰ ዲጌ ቢታ ቦላ ዬጌቲዳሰ። ኢዛ ኪታንቻቲካ ኢዛራ ኢሲፌ ዬጌቲዳ። \*

10 ሄሳፌ ጉዬ ኢሲ ገታ ገሪሰ ሳሎፕ ሂዘገሺን ታ ሲያዲሰ “ሄኮ ኣሴ ኣሾይ፣ ዋልቃይኔ ካዋቲሊካ ኑ ጎዳሰ ገዲዳሰ። ማታይካ ኪርሰቶሳሰ ገዲዳሰ። ኑ ኣሻታ ኑ ጎዳ ሲንሳን ጋላሲኔ ቃማ ሞቲዛ ኑ ኣሻታ ባርጋራይ ዲጌ ዬጌቲዳሰ። \* 11 ኢሰቲ ደርሳዛ ሱላኒኔ ባ ዮቲዳ ማርካቴላ ቃላን ኢዛ ያኒዳ። ኢሰቲ ባ ሸምፖሰ ሚሹቶንታ ዲሹ ባና ሃይቆሰ ኣሊ ኢሚዳ። 12 ሄሳ ገሽ ሳሎቲኔ ኢሰታ ገደን ዲዛይቲ ኢንቲ ዉሪካ ኡፋዬቲቲ። ኢዛሰ ጉላ ዋዳይ ኣቲዳይሳ ኤሪዳ ገሽ ዳቡሎሲ ገታ ሃንቆራ ዲጌ ኢንቲኮ ዋዲዳ ገሽ ቢታሲኔ ኣባሰ ኣዬ ኣና! ኣዬ ኣና!”

\* 12:3 ዳኔ 7:7 \* 12:4 ዳኔ 8:10 \* 12:5 ኢሳ 66:7፤ ማዛ 2:9  
\* 12:7 ዳኔ 10:13፣21፤ 12:1፤ ዩሁ 9 \* 12:9 ሚዲ 3:1፤ ሉቃ 10:18  
\* 12:10 ኢዮ 1:9-11፤ ዛካ 3:1

13 ዳዌዚ ዱጌ ቢታ ቦላ ዩጌቲዳይሳ ቤዪዲ አቱማ ና ዩሊዳ ማጫሳዮ ጎዳሬሊዳ። 14 ማጫሳያካ ባስ ጊጌቲ ዲዛሶ ፒራዳዳ ዱጌ ባዘ ባና ማላ ኢዚስ ጊታ ጎሌ ካፎ ቁፌ ሚሳቲዛ ናምቡ ቁፌቲ ኢሜቲዳ። ኢዛ ሄን ዳዌዛ ሲንጻፌ ሃካዳ ሄዡ ላይሊኔ ባጋ ጋካናስ ሎጾ ቦንቾን ናጌታዱስ። \*

15 ሄ ማጫሳዮ ዲጾይ ኤኪ ባና ማላ ሸሻዚ ሻፋ ሃሌ ኬና ሃሌ ባ ዲናፔ ጩቲዲ ኢዚፔ ጉዬ ባጋራ ጉሲዳ። 16 ጊዶ አቲን ቢታያ ሄ ማጫሳዮ ማዳዱስ። ባ ዲና ዶያዳኔ ሄ ዳዌዚ ጩቲዲ ጉሲዳ ሃላካ ፀንጻዱስ። 17 ዳዌዚ ማጫሴይ ቦላ ሃንቁቲዲ ሃንኮ አቲዳ ኢዚ ዜሬላታራ ኦሌታናስ ቢዳ። ኢስቲካ ያሳ አዛዘታ ናጊዛይታኔ ዩሱሳስ አማኔቲዲ ማርካቲዛይታ። 18 ዳዌዚካ አባ አቻን አጩ ቦላ ኤቁዳስ።

# 13

## ናምቡ ደዓታ

1 ሄሳፌ ጉዬ ኢሲ ደዓይ አባፌ ኬዚሺን ቤያዲስ። ኢዛስ ታሙ ካጩይኔ ላፑን ሁዔይ ዳስ። ካጩታ ቦላ ታሙ ዛወዳቲ ዳቲስ። ሁዔታ ቦላ ጫሻ ሱንጻቲ ዳቲስ። \* 2 ታ ቤዪዳ ደዓዚ ማሄ ሚሳቲስ። ኢዛ ቶሆይ ደዓ ዛርዶ ቶሆ ሚሳቲስ። ኢዛ ዲናይ ቃስ ጋሞ ዲና ሚሳቲስ፤ ዳዌዚ ባ ዎልቃ፣ ባ አልጋዛኔ ባ ጎዳቲላካ ሄ ደዓዛስ ኢሚዳስ። \*

3 ሄ ደዓዛ ሁዔታፔ ኢሳ ቦላ ዎዲዛ ማዲንሊ ዲዛይሳ ታ ቤያዲስ ሺን ኢዛ ሃይቆስ ጋሊዛ ማዲንጻዚ ፓዲዳ። ኩሜላ አላሜይ ማላሌቲዲ ሄ ደዓዛ ካሊዳ። 4 ሄ ደዓዛስ ጎዳቲሊ አሜቲዳ ጊሽ አሳይ ወሪካ ሄ ዳዌዛስ ጎይኒዳ። “ሃይሳ ደዓዛ ሚሳቲዛይ ኦኔ? ኢዛራ ኦሌታናስ ዳንዳዪዳይ ኦኔ?” ጊሼ ኢዛስ ጎይኒዳ።

5 ኢዛስ ቃስ ኦቶሬቲሊኔ ጫሻ ቃላ ሃሳይዛ ዲናይ አሜቲዳ። ኢዚ ኦይዲ ታማኔ ናምቡ አገና ጋካናስ ጎዳቲላን ኦላና ማላ ኢዛስ አሜቲዳ። 6 ያሳኔ ያሳ ሱንሻ ኢዚ ዲዛሶዛኔ ሳሎን ዲዛይታ ጫሼ ኦይኪዳ። 7 ኢዚ ጌሻታ ኦላና ማላኔ ያናና ማላ ኢዛስ ጎዳቲሊ አሜቲዳ። ዲማ ዲማ ቆሞታኔ ዛርኬታ፣ ዲማ ዲማ ቃላን ሃሳዪዛ ዳሬታ ኡባ ቦላ ኢዛስ ጎዳቲሊ አሜቲዳ። \* 8 አላሜይ ሜዴቶሳፔ ሃ ሲሚን ኢስታ ሱንሻ ሹኬቲዳ ደርሳዛ

\* 12:14 ዳኔ 7:25፤ 12:7 \* 13:1 ዳኔ 7:3፤ እጁ 17:3፣7-12 \* 13:2

ዳኔ 7:4-6 \* 13:7 ዳኔ 7:21

ዴዎ ማፃፋን ፃፊቶቻቸው አላሙ ቦላ ዲዛ አሳይ ወሪካ ሄ ደዓዛሰ ሆኪ ጎይናና። \*

9 ሃይሉ ዲዛዴይ ሲዮ! 10 “ዲዔታናሰ ዲዛዴይ ዲዔታና፤ ማሻን ሃይቃናሰ ዲዛዴይ ማሻን ሃይቃና” ሄሳ ጊዲዳ ጊሽ አማኒዛይታ ዳንዳያይኔ ኢሰታ አማኔቴሰ ኮሺዛይ ሃኒና። \*

11 ቃሴካ ሃራ ደዓይ ቢታፌ ኬዚሺን ቤያዲሰ። ኢዛሰ ቃሰ ደርሳ ካጩ ማላ ናምዑ ካጩይ ዴሰ። ኢዚ ዳዌላ ሃሳዬሰ።

12 ኢዚ ካሴ ኮይሮ ደዓዛ ኦላ ጌሊዲ ሄ ካሴይሳ ጎዳቴላን ኦሊሰ። ቢታያኔ ቢታ ቦላ ዲዛይቲ ወሪካ ካሴ ኮይሮ ደዓዛሰ ጎይናና ማላ ኦሊዴሰ። ሄ ደዓዚ ቃሰ ካሴ ኢዛ ሃይቆሰ ጋሊዛ ማዳንላይ ፓዲዳ ኮይሮ ደዓዛ። 13 ሄሲ ናምዓንላ ደዓዚ ቃሰ አሳ ሲንላን ታማ ሳሎፔ ዲጌ ዴጋና ጋካናሰ ጊታ ማላታታ ኦሊዴሰ።

14 ኢዚ ኮይሮ ደዓዛ ሲንላን ማላታ ኦላና ማላ ኢዛሰ አሜቲዳ ማላታ ጌደን ቢታ ቦላ ዲዛ አሳ ኢዚ ባሌሊዴሰ። ማሻን ማዳንዲዳ ፓዲዳ ደዓዛ ቦንቸሰ ሚሲሌ ኦላና ማላ ቢታ ቦላ ዲዛ አሳ ወርሲ ኢዚ አዛዛና። 15 ናምዓንላ ደዓዚ ኮይሮ ደዓዛ ሚሲሌዛሰ ሹምፖ አማና ማላ ኢዛሰ ጎዳቴሊ አሜቲዳሰ። ዴዎ ሹምፖ አማናሰ ኢዛሰ ጎዳቴሊ አሜቲዳ ሚሲሌዚ ሃሳያና ማላኔ ሄ ኢዛሰ ሆኪ ጎይናንታዴ ኢዚ ወርሲካ ዋጳና ማላሳ።

16 ናምዓንላ ደዓዚ ቃሰ ጉላታ ጊዲን ዋይኮ ጊታታ ጊዲን፣ ዲሬታ ጊዲን ዋይኮ ማንቆታ ጊዲን፣ ጎዳታ ጊዲን፣ ዋይኮ አሽካራታ ጊዲን፣ ወሪካ ባ ኡሻቻ ኩሼን ዋይኮ ባ ሊጴ ቦላ ማላታ ዋልቃራ ዋሊሳና። 17 ሄሳ ማላን ሄ ደዓዛ ሱንላ ኤሪሲዛ ዲማ ማላታይ ዋይኮ ኢዛ ሱንላ ኢዛ ቦላ ፃፊቲዳ ቁፀራይ ባይንዳዴይ ኦኒካ ጊያ ጌሊዲ ሻማናሲኔ ባይዛናሰ ዳንዳዬና።

18 ሄሳ ጊሽ አሲ ኤራ ጊዳናይ ሃኒና። ዋዝናራ ዲዛዴይ አኬኮ፤ ሄ ደዓዛ ቁፀራዚካ ሃይሳፌ ካሊ ዲዛይሳኮ። ሄሲካ ኡሱፑን ፃታኔ ኡሱፑን ታማኔ ኡሱፑና።

# 14

ደርሳዛኔ ፃታኔ ኦይዲ ታማኔ ኦይዲ ሺ አሳ

1 ሄሳፌ ጉዬ ሄኮ ሄ ደርሳዚ ፃዮኔ ሹማ ቦላ ኤቂዳይሳ ታ ቤያዲሰ። ኢዛ ሱንላኔ ኢዛ አዋ ሱንላ ኢሰታ ሊጴ ቦላ ፃፊቲዳይቲ ፃታኔ ኦይዲ ታማኔ ኦይዲ ሺ አሳቲ ኢዛራ ኢሲፌ ዴቴሰ። 2 ሳሎፔ ዋልቃማ ፒሳ ሃላ ጌሪሲኔ ዋልቃማ ዳዳ ጌሪሰ

\* 13:8 ማዛ 69:28 \* 13:10 ኤር 15:2፤ 43:11

ሚሳቲዛ ገሪሲካ ሲያዲስ። ታኒ ሲዪዳ ገሪሳይ ዲሊ ሚሳቲዛ ባጋና ጌቲቲዛይሳ ዲዲዲ ኣሳይ ሲሲዛ ገሪሳ ማላ ገሪዛይሳ።  
 3 እልጋ ሲንሳኒኔ ኦይዲ ደዓታ ሲንሳን ጨማታ ሲንሳን ፃታኔ ኦይዲ ታማኔ ኦይዲ ሺ ኣሳይ ኦራላ ዩል ዩዲደስ። ሄ ዩላዛካ ዴራ ጋርሳፌ ደሬቲዳ ፃታኔ ኦይዲ ታማኔ ኦይዲ ሺ ኣሳፕ ኣቲን ሃራይ ኦኒካ ኢዛ ታማራናስ ዳንዲይቤና። 4 ሄይቲ ማቸንታይታ ጊዲዳ ገሺ ኢስቲ ማጫራ ኣቁዲ ቱንቤቴና። ኢስቲ ደርሳይ ቢዛስ ኢዛ ካሌቴስ። ኢስቲ ያሳሲኔ ኢዛ ደርሳዛስ ኣሳ ጋርሳፌ ፃራ ካላ ማላ ሺቁዲይታ። 5 ኢስቲ ዋርዶ ሃሳያ ኤሬቴና። ዋሶይካ ኢስታ ቦላ ባዋ። \*

**ያሳ ፐርዳ ኤሪሲዛ ሄቱ ኪታንቻታ**

6 ሃሳፌ ጉዬ ቢታ ቦላ ዲዛ ዲማ ዲማ ቃላን ሃሳዪዛ ዲማ ዲማ ዴሬታ፣ ዛርኬታስ፣ ቆሞታስ፣ ኡባስ የታናስ ሜርና ሚሺራቸ ቃላ ኦይኪዳ ሃራ ኢሲ ኪታንቻይ ሳሎን ቦላን ፐራዲሺን ቤያዲስ። 7 ኢዚካ ባ ቃላ ቶቁ ሂስቲዲ “ያሳስ ባቢቴኔ ኢዛ ቦንቹቲ። ኢዛ ፐርዳ ዋይይ ጋኪዳስ። ሳሎኔ ቢታ፣ ኣባኔ ሃላ፣ ፑልቶካ ሜዲዳ ያሳስ ጎይኒቲ” ገዴስ።

8 ሃራ ናምባንሉ ኪታንቻይ ቃስ “ዴሬዛ ዉርሳ ማሉዛ ላይማ ዋይኔ ጫጃ ኡሺዳ ማጫሳያ ሂናካ ዋጋ ጌታ ባቢሎና ኩንዳዲስ! ኩንዳዲስ!” ገሺ ኮይር ኪታንቻዛ ካሊዴስ። \*

9 ሃራይ ሄቸንሉ ኪታንቻይ ቃስ ጌታ ቶቃ ቃላን ሂዝጊሼ ኢስታ ካሊዴስ “ሄ ደዓዛሲኔ ኢዛ ሚሲሌዛስ ጎይኒዛይቲኔ ባ ሊጴ ቦላ ዋይኮ ባ ኩሼ ቦላ ዋሊዛይቲ ዉሪካ፣ 10 ያሳ ሃንቆ ዋይኔ ጫጃዛ ኡያና። ሃሲካ ሄ ዋይኔ ጫጃዚ ሃራራ ዋላኬቶንታ ኢዛ ሃንቆ ፀዓፕ ዲቁቲዳይሳ። ሃሳሉካ ሃንኮ ጌሻ ኪታንቻታ ሲንሳኒኔ ደርሳዛ ሲንሳን ታማኒኔ ዲኔ ታማን ፀጌታና። \* 11 ኢስቲ ኢዛን ፀጌቲዛ ታማፕ ኬዚዛ ጨዋዚ ሜርፕ ሚርናስ ፑዴ ኬዚሼ ዳና። ሄ ደዓዛሲኔ ኢዛ ሚሲሌዛስ ጎይኒዛይቲ ዋይኮ ኢዛ ሱንሳ ማላታ ባ ቦላ ዋሊዳይቲ ዉሪካ ዋንታኔ ቃማን ኢስታስ ሺምፖይ ዴና።” \*

12 ያሳ ኣዛዘ ናጊዛይታፔኔ ዩሱሳ ኣማኖን ሚኒዳ ጌሻታፔ ኮዬቲዛ ዳንዲያይ ሃኒንኮ።

---

\* 14:5 ሶር 3:13 \* 14:8 ኢሳ 21:9፤ ኤር 51:8፤ እጅ. 18:2 \* 14:10 ኢሳ 51:17፤ ሜዴ 19:24፤ ሄዚ 38:22 \* 14:11 ኢሳ 34:10

13 ታኒ ሳሎፔ ሂዝጊዛ ቃላ ሲያዲስ “ሃይሳፌ ጉዬ ጎዳ ዩሱሳይታ ገዲዲ ሃይቃናይቲ ኢስቲ ኣንጃቲዳይታ።” ዲሎ ኣያናይካ “ኤ፣ ኢስቲ ባ ዳቡርሳፌ ሼምፓና ማላ ኢስታ ኦሶይ ኢስታ ካላና” ጌስ።

**ቢታ ቦላ ጎዳ ሃንቆ**

14 ሄሳፌ ጉዬ ታ ዲሊሺን ታስ ቦላ ሻራይ ቤቲዳስ። ሄ ሻራ ቦላ ቃስ ና ሚሳቲዛይ ኡቲዳስ። ኢዚ ቃስ ባ ሁዔ ቦላ ዋርቃ ኣክሊሌ ዋሊዳስ። ባ ኩሼንካ ቃራ ባጫ ኦይኪዳስ። \* 15 ሃራ ኪታንቻይ ያሳ ኬላፌ ኬዚዲኔ ሻራ ቦላ ኡቲዳይሳስ ጶቃ ቃላራ “ቢታ ቦላ ቦኔይ ጋኪዳስ! ካላይ ጫኬቲዛ ሳቲይ ማቲዳስ” ጊሼ ዋሲዳስ። \* 16 ሄ ሻራ ቦላ ኡቲዳይሲ ባጫዛ ዲጌ ቢታ ቦላ ዩዲዳስ። ቢታይካ ጫኬቲዳስ።

17 ቃሴ ሃራ ኪታንቻይ ቦላ ሳሎን ዲዛ ዋሳ ኬላፌ ኬዚዳስ። ሄ ኢዚካ ቃራ ባጫ ባ ኩሼን ኦይኪዳስ።

18 ታማ ቦላ ኢዛስ ጎዳቲላ ዲዛ ሃራ ኪታንቻይ ያርሾ ኢዛ ቦላ ሺሺዛሶዛ ኣቻፌ ኬዚዲ ሄ ቃራ ባጫ ኦይኪዳ ኪታንቻዛስ “ሚላ ኣይፊይ ካዲዳ ጊሽ ኔኒ ሃዒ ኔ ቃራ ባጫዛ ዩዳዳ ዋይኔ ሚላ ኣይፊዛ ዉርሳ ጫካዳ ቢታፌ ሺሻ” ገዲ ገታ ቃላን ዋሲዳስ። 19 ኪታንቻዚካ ባጫዛ ዲጌ ቢታ ቦላ ዩዲዲ ቢታን ዲዛ ዋይኔ ሚላ ኣይፊዛ ጫኪዲ ዋጋ ያሳ ሃንቆ ዋይኔ ኣይፊ ጉምዒዛሶን ዩጊዳስ። 20 ካታማፔ ካሬ ባጋራ ዲዛ ዋይኔ ሚላ ኣይፊ ጉምዒዛሶን ጉሚዳቲዳስ። ሄ ጉምዒዛሶዛፔካ ቢታፌ ጶቃቲላ ፓራ ቢፃላ ጋካናሲኔ ኢሲ ሺያኔ ኡሱፑን ፃት ኪሎማቲሬ ገዲዛሶ ጋካናስ ሱላ ጎጊዳስ። \*

**15**

**ዉርሴላ ቦሻታ ኦይኪዳ ኪታንቻታ**

1 ታኒ ሃራ ዋልቃማ ማላታ ሳሎ ቦላ ቤያዲስ። ያሳ ሃንቆይ ኢስታን ፖሌታናስ ዉርሴላ ገዲዳ ላፑን ቦሻታ ኦይኪዳ ላፑን ኪታንቻታ ቤያዲስ።

2 ሄሳፌ ጉዬ ታማራ ዋላኬቲዳ ማሰቶቲ ኣባ ሚሳቲዛ ሚሽ ቤያዲስ። ሄሳቶካ ሄ ዶዓዛኔ ኢዛ ሚሲሌዛ ኢዛ ሱንላ ቁፁሬዛ ማላታ ያኒዳይታ ቤያዲስ። ያሲ ኢስታስ ኢሚዳ ዲላ ማላ ባጋና

\* 14:14 ዳኔ 7:13 \* 14:15 ኢዩ 3:13 \* 14:20 ኢሳ 63:3፤ ኤር ዚላ 1:15፤ እጁ 19:15

ጌቲቲዛይሳ ኦይኪዲ ማሰቶቲ ሚሳቲዛ ኣባ ኣቻን ኤቂዳ። 3 ያሳ ኦሳንቻ ሙሴ ዩሊኔ ደርሳዛ ዩሉ።

“ኡባ ዳንዳዩዛ ጎዳ ያሶ!  
ኔ ኦሶይ ጌታኔ ማላሊሲዛዛ፤  
ዴሬ ካዎዞ!

ኔ ኦጌይ ሊኬኔ ቱማ። \*\*

4 ጎዳ ኔሰ ባቦንታ ኣሲኔ  
ኔ ሱንሐ ቦንቻንታ ኣሲ ኦኔ?

ኔኒ ኔርካ ጌሻ።

ኔ ቱማ ፐርዳይ ቆንጨዳ ጊሽ ዴሬቲ ዉሪ ዩዲ

ኔ ሲንላን ኔሰ ጎይናና” ጌ ዩዲዳ \*

5 ሄሳፌ ጉዬ ታ ዛራ ያሊሽን ካሴ ማርካቴላ ዲንካኔ ጌዲዳይሲ ያሳ ኬሌ ሳሎን ደዬቲዳሰ። \* 6 ላፑን ቦሻታ ኦይኪዳ ላፑን ኪታንቻቲ ያሳ ኬላፌ ኬዚዳ። ኢሰቲ ቃሰ ጌሽ ጌዲዲ ያልቂዛ ቦላ ማይያ ማይዲዳ። ዎርቃፌ ኦሴቲዳ ዳንጮ ማላ ማይያ ቲራ ቦላ ቃቹዳ። 7 ኦይዲ ደዓታፔ ኢሶይ ላፑን ኪታንቻታሰ ሜርናፔ ሜርናሰ ዲዛ ያሳ ሃንቆይ ኢሰታን ኩሚ ኡቲዳ ላፑን ዎርቃ ፀዓታ ኢሚዳሰ። 8 ያሳ ኬላይካ ያሳ ቦንቻፌኔ ኢዛ ዎልቃፌ ዴንዲዳይሳን ጨዎይ ኢዛን ኩሚዳሰ። ላፑን ኪታንቻቲ ባ ኩሼን ኦይኪዳ ላፑን ቦሻቲ ፖሌታና ጋካናሰ ኦኒካ ሄ ያሳ ኬሌ ጌላናሰ ዳንዳይቤና። \*

# 16

## ያሳ ሃንቆራ ዲዛ ፀዓታ

1 ሄሳፌ ጉዬ ላፑን ኪታንቻታ “ኢንቴ ቢዲ ያሳ ሃንቆ ኦይኪዳ ላፑን ፀዓታ ዲጌ ቢታ ቦላ ጉሲቲ!” ጌዛ ጌታ ቃላይ ያሳ ኬላፌ ኬዚሽን ታ ሲያዲሰ።

2 ኮይሮ ኪታንቻዚ ቢዲ ፀዓዛ ቢታ ቦላ ጉሲዳሰ። ደዓዛ ማላታይ ኢሰታ ቦላኔ ሄ ደዓዛ ሚሲሌሰ ጎይኒዛያታ ቦላ ኢታ ዎይሲዛ ማዲንሐ ኬዚዳሰ። \*

\* 15:3 ዴሬ ካዎዞ። ኢሲ ኢሲ ቢርሼላቲ ዎዲታ ካዎዞ ጌቲሰ። \* 15:3 ኬሳ 15:1 \* 15:4 ኤር 10:7፤ ማዛ 86:9 \* 15:5 ኬሳ 38:21 \* 15:8 ኬሳ 40:34፤ 1ካዎ 8:10-11፤ 2ታር 5:11-14፤ ኢሳ 6:4 \* 16:2 ኬሳ 9:10



3 ናምዓንጎሳ ኪታንቻዚ ቃስ ፀዓዛ አባ ቦላ ጉሲዴስ። አባይካ ሃይቁዳ አሳ ሱላ ማላ ጊዲዴስ። አባ ጊደን ሼምፖራ ዲዛይቲ ወሪካ ሃይቁዳ።

4 ሃቸንጎሳ ኪታንቻይ ባ ፀዓዛ ሻፋታ ቦላኔ ፑልቶ ሃላታ ቦላ ጉሲዴስ። ሄ ኢሰቲካ ሱላ ጊዲዴ። 5 ሃላ ቦላ ኢዛሰ ጎዳቴላ ዲዛ ኪታንቻዚ። “ካሴካ ሃዒካ ዲዛ ጌሻ ጎደ! ኔኒ ሄሳሶ ፐርዲዳ ጊሽ ኔኒ ቱማንቻ። 6 አሳይ ካሴ አማኒዛይታ ሱላኔ ናቤታ ሱላ ጉሲዳ ጊሽ ኔ ኢሰታ ሱላ ኡሻዳሳ። ሄሰካ ኢሰታሰ ቤሴስ” 7 ያርሾ ያርሺዛሶዛፔ ቃስ “ኤ ወርሳ ደንዳዪዛ ጎዳ ያሶ! ኔ ፐርዳቲ ወሪካ ቱማኔ ሊኬ” ጊዛ ቃላ ሲያዲሰ።

8 ኦይዳንጎሳ ኪታንቻዚ ባ ፀዓዛ አዋ አርሼ ቦላ ጉሲዴስ። አዋ አርሼይካ አሳ ባ ሴላን ፀጋና ማላ አዋ አርሼሰ ዋልቃይ ኢሜቲዴስ። 9 አሳይካ ዋልቃማ ሴላን ፀጌቲዴስ። ሄ ቦሻታ ቦላ ሼኔይ ኢዛሰ ዲዛ ያሳ ሱንሳ አሳይ ጫዴዴስ አቲን ማርቲላን ጌሊቤናኔ ኢዛካ ቦንቺቤና።

10 ኢቻሻንጎሳ ኪታንቻይ ባ ፀዓ ደዓዛ አልጋ ቦላ ጉሲዴስ። ሄ ደዓዛ ካዋቲላ ቃስ ቆሚዴስ። አሳይ ቃስ ዋዬዛፔ ዴንዲዳይሳን ባርካ ባ አንፃርስ ጋርጨዴስ። 11 ኢሰቲ ቃስ ሄ ማዳንጎሳ ሳጐፔ ዴንዲዳይሳን ሳሎ ያሳ ቃንጊዳ አቲን ማርቲላን ጌሊቤቴና።

12 ኡሱፑንጎሳ ኪታንቻይ ቃስ ባ ፀዓዛ ዋጋ ኤፊራዒሴ ሻፋን ጉሲዴስ። አዋ አርሼይ ሞኪዛ ባጋፊ ያና ካዋታሰ ኦኔ ጊሊሳና ማላ ሻፋዚ ሜሊዴስ። 13 ሄ ዳዌዛ ዲናፔኔ ሄ ደዓዛ ዲናፔ፣ ዋርዶ ናቤዛ ዲናፔ አቃርሰ ሚሳቲዛ ሄቸ ቱና አያናቲ ኬዚሺን ታ ቤያዲሰ። 14 ሄይቲ ቃስ ማላታታ ኦሊዛ ዳይዳንጎሳ አያናታ። ሄይቲ አያናቲ ወርሲ ደንዳዪዛ ጎዳ ጌታ ጋላሰ ሃናና ኦላሰ አሳ ሽሻናሰ አላሜ ካዋቲ ዲዛሶ ኡባ ባና።

15 “ሄኮ ታኒ ካይሶ ማላ ቆፖንታ ጋካ ዋቆና። ኢዚ ካሎቲን አሳይ ኢዛ ካሎቴላ ቤዮንታ ማላ ቤጊዲኔ ባ ማይያ ናጊዛ አሲ ጋላቴቲዳዳ!” \*

16 አያናቲካ ካዋታ ኢብራዌ አሳ ቃላራ፣ “አርማጌዶኔ” ጌቲቲዛ ሶ ሺሺዳ። \* 17 ላፑንጎሳ ኪታንቻዚ ባ ፀዓዛ ጫርኮ ቦላ ጉሲዴስ። ያሳ ኬላ ጊደን ዲዛ አልጋዛፔ “ፖሌቲዴስ” ጊዛ ዋልቃማ ቃላይ ኬዚዴስ። 18 ዋልቃንላ፣ ዳዳ ጊሪሲኔ ጉጉንላ፣ ጌታ ቤታ ቃላ ሃኒዴስ። አሲ ቤታ ቦላ ሜዴቶሳፔ ሃኖ ጋካናሰ

\* 16:15 ማቶ 24:43-44፤ ሉቃ 12:39-40፤ እጁ 3:3 \* 16:16 2ካዎ 23:29፤ ዛካ 12:11

ሄሳ ማላይ ቢታ ቦላ ሃኒ ኤሬና። \* 19 ዋጋ ካታማያ ሄቭ ኩዛ ሻኬታ ዋዳዲስ። አይዘቤታ ካታማቲ ላሌቲዳ ያሲ ዋጋ ካታማዮ ባቢሎኔ ዛሪ ቆፒዳስ። ሚኖ ሃንቆ ፀዓን ኩሚ አቲዳ ዋይኔ ጫጃ ኡሻ ኡያና ማላ ኦሲዳስ። \* 20 አባ ጊደን ዲዛ ዳሬቲ ዉሪካ ባቃቲዳ፤ ዙማቲካ ቤቲቤቴና። \* 21 ኢሲ ኢሲ ሻቺ ኦይዱ ታማኔ ኢቻሹ ኪሎ ጊዲዛ ሻቺ ሳሎፕ ዲጌ አሳ ቦላ ዋዳዲስ። ቦቻዚ ዳር ኢታ ጊዲዳ ጊሽ አሳይ ሄ ሻቻ ቦሻ ጌደን ያሳ ጫዬዳስ። \*

# 17

## ላይማን ኤሬቲዳ ማጫሳዮኔ ደዓዛ

1 ላፑን ፀዓታ ባ ኩሽን ኦይኪዳ ላፑን ኪታንቻታፔ አሶይ ሃ ታኮ ዩዲ ታስ “ሃ ያ፣ ዳር ሃሳታ ቦላ ኡቲዳ ሄ ኢታ ላይማ ማጫሳይ ቦላ ጋኪዛ ፒርዳ ታ ኔና ቤሳና። \* 2 ቢታ ቦላ ዲዛ ካዋቲ ዉሪካ ኢዚራ ላይማቲዳ። ቢታ ቦላ ዲዛ አሳይካ ኢዚ ላይማቴላ ዋይኔ ጫጃን ማሶቲዳስ” ጊደስ። \*

3 ሄሳፌ ጉዬ ኪታንቻዚ ታና ኣያናን ዲጌ ባዞ ቢታ ኤፊዳስ። ኢዛ አሳቴላዚ ኩሚሳ ጫሻ ሱንሳን ያፊቲዳ ላፑን ሁዔቲኔ ታሙ ካጩቲ ዲዛ ኢሲ ዞዖ ደዓዛ ቦላ ኡቲዳ ኢሲ ማጫሳዮ ቤያዲስ። \* 4 ሄ ማጫሳያ ጋላልዖ ማላ ማይዖኔ ዞዖ ማይዖ ማይዖዲስ፤ ዋርቃን፣ ቦንቾ ሹቻኒኔ አንቆ ጌቲቲዛ ኣልዖ ሚሺ ማይዖዳ ጸላዉስ፤ ኢዛ ባ ኩሽን ቃስ ኢታ ሹኒዛ ሚሺኔ ባ ቱና ላይማቴላ ኢዛን ኩሚዳ ዋርቃ ፀዓ ኦይካ ኡታዲስ። \*

\* 5 ኢዚ ሊጴ ቦላ “ፀራ፣ ላይማቲዛይታሲኔ ቢታ ቦላ ቱና ኦሲዛይታስ ኣዮ ዋጋ ባቢሎኔ” ጌቲቲዛ ሱንሳ ያፊቲ ኡቲዳስ። 6 ሄና ሄ ማጫሳያ ጌሻታ ሱላኒኔ ዬሱሳ ሱንሳን ሃይቂዳ አሳ ሱላን ማሶቲዳር ታኒ ቤያዲስ። ታ ኢዞ ቤያዳ ዳር ማላሌታዲስ። 7 ጊደ አቲን ኪታንቻዚ ቃስ ታና “ኔ ኣዛስ ማላሌታይ? ሃ ማጫሳያ ፀራ ዮዖኔ ኢዛ ኢሰታ ቦላ ኡቲዳ ላፑን ሁዔታኔ ታሙ ካጩቲ ኢዛስ ዲዛ ደዓዛ ፀራ ታ ኔስ ቆንጨሳና። 8 ኔ ቤዩዳ ደዓዚ ካሴካ ዲዛይሳኮ ሺን ሃዒ ዳና። ኢዚ ጉዬፔ ጨማ ኦላ ጊደፊ

---

\* 16:18 እጁ 8:5፤ 11:13:19 \* 16:19 አሳ 51:17 \* 16:20 እጁ 6:14 \* 16:21 ኬሳ 9:23-24፤ እጁ 11:19 \* 17:1 ኤር 51:13 \* 17:2 አሳ 23:17፤ ኤር 51:7 \* 17:3 እጁ 13:1 \* 17:4 ኤር 51:7

ከዛናኔ ጌዴ ጳዮሶ ባና፤ አለሜይ ሜዴቶሳፔ ኢስታ ሱንሊ ዴዖ ማፃፋን ፃሬቶንታ ቢታ ቦላ ዲዛ አሳይ ሄ ደዓዚ ካሴካ ዲዛይሳ ሃዒ ቃስ ደንታይሳ ጉዬፔ ያናይሳ ጊዲዳይሳ ቤዪዲ ማላሌታና።  
\*

9 “ዩሺ ቆፒዛ ኤራ አሲ ኮዬተዛይ ሃኒና። ላፑን ሁዔቲ ሄ ማጫሳያ ኢስታ ቦላ ኡቲዳ ላፑን ዙማታ። ሄይቲካ ላፑን ካዎታኮ። 10 ሄ ላፑን ካዎታፔ ኢቻሻቲ ኩንዲዳ። ኢሶይ ሃዒ ዴስ። ሃንኮይሲ ቃስ ቡሮ ዪቤና። ኢዚ ዪዲ ጉላ ዎዴ ታካናሰ ቤሴስ። 11 ኦስፑንሎ ካዎዚ ካሴ ዲዛዴ ሺን ሃዒ ቃስ ባይንዳ ደዓኮ። ኢዚ ላፑናታፔ ኢሳ። ኢዚካ ጌዴ ጳዮሶ ባና።

12 “ኔ ቤዪዳ ታሙ ካጬቴ ቡሮ ካዎቶንታ ታሙ ካዎታ። ጊዲኮካ ኢስቲ ሄ ደዓዛራ ኢሲፌ ኢሲ ሳቲስ ደዓዛራ ካዎታናስ ካዎቲላ ዎልቃ ዴማና። \* 13 ሄ ታሙ ካዎታስ ኢሲ ቆፋይ ዴዓና። ኢስቲ ባ ዎልቃኔ ባ ጎዳቲላ ሄ ደዓዛሰ አሊ ኢማና። 14 ኢስቲ ደርሳዛ ቦላ ኦላ ዴንላና ሺን ደርሳዚ ጎዳታስ ጎዳኔ ካዎታስ ካዎ ጊዲዳ ጊሽ ኢዚ ኢስታ ያናና። ኢዛራ ዲዛይቲ ዪይጌቲዳይታ፣ ደሬቲዳይታኔ አማኔቲዳይታ” ጊዴስ። 15 ሄ ኪታንቻዚካ ታስ “ሃ ላይማ ማጫሳያ ኢስታ ቦላ ኡታ ዲሺን ኔጌ ቤዪዳ ሃላታ፣ ዴሬታ፣ አሳታ፣ ዲማ ዲማ ቆዎታ ቃሴካ ዲማ ዲማ ቃላን ሃሳዪዛይታ። 16 ሄ ደዓዚኔ ኔ ቤዪዳ ታሙ ካጬቴ ሄ ላይማ ማጫሳዮ ኢፀቴስ። ኢስቲ ኢዞ ጳዮሶ ጋላና፤ ካሎ ሜላ አሻና፤ ኢስቲ ኢዚ አሾ ማናኔ ኢዞ ታማንካ ፀጋና። 17 ባ ቆፋ ፖላናስ ሃይሳላ ኦላና ማላ ሄሳ ሄ ቆፋ ኢስታ ዎዝናን ዎሊዳይ ያሳ። ሄሳ ጊሽ ያሳ ቃላይ ፖሊታና ጋካናስ ኢስቲ ቆፋን ኢሲኖ ጊዳና። ባ ካዎቲላ ጎዳቲላካ ሄ ደዓዛሰ አሊ ኢማና። 18 ኔ ቤዪዳ ማጫሳያ ቢታ ካዎታፔ ቦላራ ካዎታና ዲዛ ዎጋ ጊታ ካታማዮ” ጊዴስ።

# 18

## ባቢሎኔ ኩንዳሳ

1 ሃሳፌ ጉዬ ጎዳቲላ ኢዛሰ ዲዛ ሃራ ኪታንቻይ ሳሎፔ ዲጌ ዎዲሺን ቤያዲስ። ኢዛ ቦንቾ ፖፔ ዴንዲዳይሳን ቢታይካ ፖዒዴስ።

2 ኢዚ ቃስ ጴቃ ቃላን “ጊታ ባቢሎና ኩንዳዲስ! ኩንዳዲስ! ኩንዳዲስ! ዳይዳንላ ዲሳ ሶ ጊዳዲስ! ቱና ኢያናታስ አቆሶ ጊዳዲስ! ሃራሲዛ ኢታ ካፎታስ ሸምፖሶ፣ ኢታኔ ሃራሲዛ

\* 17:8 ዳኔ 7:7፤ እጁ 11:7፤ ማዛ 69:28 \* 17:12 ዳኔ 7:24

ደባታሲካ አቆሶ ገዳዲሰ። \* 3 ዳሬ አሳ ወርሳ ማለሲዛ ባ ላይማቴላ ዋይኔ ጫጃዛ ኡሻዲሰ። ቢታ ቦላ ዲዛ ካዋቲ ኢዚራ ላይማቴዳ። ቢታ ቦላ ዲዛ ዛልዓንቻቲ ኢዚሰ ዲዛ ኢሻሎ ዲሳፊ ዳንዲዳይሳን ዳር ዲሬቲዳ” ገ ዋሲዳሰ \*

4 ቃሴካ ሃራ ቃላይ ሳሎፔ “ታ ዳሬቶ! ኢንቴ ኢዚራ ኢዚ ናጋራን ዙፔቶንታ ማላኔ ኢዞ ጋኪዛ ቦሻ ኢንቴ ኢዚራ ገሼቲ ኤኮንታ ማላ ኢዚፔ ሻኬቲ ኮዚቲ። \* 5 ኢዚ ናጋራይ ደሬቲዲ ፑዳ ሳሎ ጋኪዳሰ። ያሲካ ኢዚ ሞርዛ አኮኪዳሰ። \* 6 ኢዚ ኢሚዳሪ ገና ኢዚሰ ኩሼ ዛሪቲ፤ ኢዚ ኦሶ ገሽ ኢዚሰ ናምዑ ኩሼ ጨገቲ፤ ኢዚሰ ናምዑ ኩሼ ኢዚይሳፊ አሊ ዋላኪቲ። \*

7 ኢዛ ባሰ፣ ባ ቦንቸሲኔ ባሰ ገጋና ማላ አምይሳ ገና ዋዬኔ ሙዙቴላ ኢዚሰ ኢሚቲ፤ ኢዛ ባ ዋዝናራ ‘ታኒ ካዋ ማቺ ማላ ኡታዲሰ አቲን አምዒ ማላ ገዲኬ። ታና ሙዙቴሊ ሙሉካ ጋኬና ጋዳ ጩቁታዉሰ። 8 ሃሳ ገሽ ኢዚ ቦላ ቦቻይ ዉሪካ ኢሲ ጋላሰ ጋካና። ሃይቆይ፣ ሙዙቴሊኔ ጋፋይ ኢዞ ጋካና፤ ኢዛ ታማን ፀጌታና፤ ኢዚ ቦላ ፐርዲዛ ሳዳይ ያሲ ኢዚ ሚኖ” ገሽን ታኒ ሲያዲሰ።

9 ኢዚራ ላይማቴሼ ኢሻሎ ዲሰ ዳዩዳ ሃ ቢታ ካዋቲ ኢዛ ፀጌቲሽን ጩዋቲዛ ጩዋ ቤዩዲ ኢዚ ገሽ ዋሲዲ ዩካና። 10 ኢዚ ዋዩዛሰ ባቢዳ ገሽ ሃሆን ኤቂዲ “ሃኔ ገታ ካታማዬ! ሃኔ ሚኖ ካታማዬ ባቢሎኔ! ኔ ፐርዳይ ማዳ ኢሲ ሳቴ ገደን ዩዳ ገሽ ኔሰ አዩ አና! አዩ አና!” ጋና።

11 ሃይሳፊ ጉዬ ኢሰታ ማርካቤን ጫኔቲዳዝ ሻሚዛ አሲ ባይንዳ ገሽ ቢታ ቦላ ዲዛ ዛልዓንቻቲ ኢዚሰ ዩካናኔ ካዮታና። \* 12 ኢሰታ ማርካቤን ጫኔቲዳይ ዋርቃ፣ ቤራ፣ አልዎ ሹቸ ኢንቁ፣ ለዔ ማይዎ፣ ጋላልዎ ማላ ማይዎ፣ ሃሬ ጌቲቲዛ ማይዎ፣ ዘዎ ማይዎኔ ሎዎ ሳዋ ሳዋዛ ማላ ኡባ፣ ዳንጋርሳ ዛሌ፣ አልዎ ማላፊ፣ ዓርቂማላፔ ቢራታፔኔ ዋሊዎጆፊ ኦሴቲዳ ሚሺ ዉሪካ 13 ቃራፋ፣ ሳዋ፣ ሳዋዛ ሚሊ፣ ካርቤ፣ ኤፃኔ፣ ዋይኔ ጫጃ፣ ዋጋራ ዛይቲ፣ ጁሌ፣ ገሰቲ፣ ሚዝ፣ ዶርሳታ፣ ፓራታ፣ ፓራ-ጋሬታ፣ አይሌታኔ ሃራ አሳታኮ።

\* 18:2 ኢሳ 21:9፤ ኤር 51:8፤ እጃ 14:8፤ ኢሳ 13:21፤ ኤር 50:39 \* 18:3 ኢሳ 23:17፤ ኤር 51:7 \* 18:4 ኢሳ 48:20፤ ኤር 50:8፤ 51:6፣45 \* 18:5 ሚዴ 18:20-21፤ ኤር 51:9 \* 18:6 ማዛ 137:8፤ ኤር 50:29 \* 18:11 ሂዘ 27:31፣36

14 ዛልዓንቻቲ “ሃኔ ኔኒ አሞቲዳ ሎዎ ሚሻቲ ወሪካ ኔፔ ሃኪ ቢ ገዲዳ። ኔ ሃርይካ ኔ ጌዳይካ ወሪካ ዳዩዴሰ። ሃይሳፌ ጉዬ ኔኒ ሄይታንታ ሙሌካ ዛራ ዴማካ!” ጋና። 15 ሄይታንታ ወርሲ ሻሚ ሻሚዲ ዲሬቲዳ። ዛልዓንቻቲ ኢዚ ቦላ ጋኪዳ ዋዬዛሰ ባቢዲ ሃሆን ኤቃና፣ ዩኪሼኔ ሙዞቲሼ \* 16 “ካሴ ለዔ ማይዶኔ ጋላልዎ ማይዎ ቃሴካ ዘዎ ማይዎ ማይዲዛሪሰ፣ ዋርቃኒኔ ቦንቾ ሹቻን፣ ኢንቁንካ ጰሊዳ ገታ ካታማይሰ አዬ አና! አዬ አና! 17 ሄሳ ማላ ሃርይ ኢሲ ሳቲ ጋርሳን ዳዩዴሰ” ጋና።

ማርካቤ አዛዚዛይቲ ወሪ ማርካቤን ቢዛይቲ ወሪ ማርካቤ ገደን አላዛይቲ ወሪካ አባ ገደን ዛልዓንቻቲ ወሪካ ሃሆን ኤቃና። \* 18 ኢዛ ፀጌቲሺን ጨዋቲዛ ጨዋ ቤዩዲ “ሃሮ ሃ ገታ ካታማዮ ሚሳቲዛ ካታማይ ሃራይ አዋን ዳንዴ?” ገሼ ዋሲዳ። \* 19 ባ ሁዔን ጉዲላ ቆሊዲ ዩኪሼኔ ሙዞቲሼ “አባ ቦላ ማርካቤይ ዲዛይቲ ወሪካ ኢዚ ሚሹን ዲሬቲዳይቲ፣ ሃና ገታ ካታማያ ኢሲ ሳቲ ገደን ሙሌራ ዳይዳ ገሽ ኢዚሰ አዬ-አና! አዬ-አና!” ገ ዋሲዳ። \* 20 ሳሎዞ! ኢዚ ጌደን ኔ ኡፋዬታ፤ ያሲ ኢንቲ ገሽ ኢዚ ቦላ ፐርዲዳ ገሽ ኢንቲ ጌሻቲ፣ ሃዋሪቲኔ ናቤቲካ ኡፋዬቲቲ። \*

21 ሄሳፌ ጉዬ ኢሲ ሚኖ ኪታንቻይ ዎልቃማ ዎፃ ሹቾ ሚሳቲዛ ኢሲ ሹቾ ዴንላዲ “ገታ ካታማያ ባቢሎና ሄሳሳካ ዎልቃራ ሱጌታዳ ኩንዳና። ሃይሳፌ ጉዬ ሙሌካ ቤቲኩ። \* 22 ዲላ ሚሳቲዛ ባጋና ጌቲቲዛይሳ ሾጪዛይታኔ ዬላ ዩዳዛይታ ዬላ ሱሱልዔ ሱሱልዒዛ አሳይኔ ዲንኬ ፑኒዛይታ ገሪሰ ናምዓንላ ኔናን ሲዬቲና። አይ ማላ ኩሼ ሂላቴላ አላዛ ኤራ አሲ ሃይሳፌ ጉዬ ኔናን ቤቲና፤ ዎፃ ገሪሰ ሃይሳፌ ጉዬ ኔናን ሲዬቲና። \* 23 ታማ ፖይይ ሃይሳፌ ጉዬ ኔናን ፖዔና። አዴኔ ማጫ ሚሹራ ቃላይ ሃይሳፌ ጉዬ ኔናን ሲዬቲና። ኔ ዛልዓንቻቲ ካሴ አላሚን ኤሬቲዳይታ። ኔኒ ቃሰ አሳ ወርሳ ሙሬኖን ባሌላዳሳ።

24 ኢዚ ገደን ናቤታ ሱንላ፣ ጌሻታ ሱንላኔ ቢታ ቦላ አሳ ኩሼን ሃይቁዳይታ ኡባታ ሱንላ ቤቲዴሰ” ገሼ ዲጌ አባ ገደ ዩጌዴሰ። \*

---

\* 18:15 ሂዚ 27:31፣36 \* 18:17 ኢሳ 23:14፤ ሂዚ 27:26-30 \* 18:18 ሂዚ 27:32 \* 18:19 ሂዚ 27:30-34 \* 18:20 ዛሬ 32:43፤ ኤር 51:48 \* 18:21 ኤር 51:63-64፤ ሂዚ 26:21 \* 18:22 ኢሳ 24:8፤ ሂዚ 26:13 \* 18:24 ኤር 51:49

# 19

1 ሄሳፌ ጉዬ ዳር አሳ ቃላ ገሪስ ሚሳቲዛ ገታ ቃላ ገሪስ ሳሎፔ “ሃሌ ሉያ! አቶቴላ፣ ቦንቾይ፣ ዋልቃይካ ኑ ጎዳሳ። \*  
 2 ኢዛ ፒርዳይ ቱማኔ አዳ፤ ኢዛ ቢታ ባ ላይማቴላን ቱኒሲዳ ዋጋ ገታ ላይማኖ ኢዚ ባ ፒርዳን ኢዛ ቃፃይዳስ፤ ኢዛ ቃፃይዳ ባ ኦሳንቻታ ሱፋ ሃሎ ኬሲዳስ” ገሺን ታ ሲያዲስ። 3 ቃሴካ “ሃሌ ሉያ፤ ኢዚፔ ኬዚዛ ጩዋይ ሜርናፔ ሜርና ጋካናስ ፑዴ ጩዋቲሽ ዳዓና” ገሺ ዋሲዳ። \*

4 ናምቡ ታማኔ ኦይዱ ጨማቲኔ ኦይዱ ደዓቲ አልጋ ቦላ ኡቲዳ ያሳስ ባ ሊጴ ቦላ ኩንዲዲ “ኣሚን፤ ሃሌ ሉያ!” ገሺ ኢዛስ ጎይኒዳ።

## ደርሳዛ ሳርጌ ዲጊሳ

5 ሄሳፌ ጉዬ “ኢዛስ ያዩዛ ኢዛ ኦሳንቻቲ ወሪካ ጉፋቲኔ ገታቲ ኑ ጎዳ ጋላቲቲ” ገዛ ቃላይ አልጋፌ ኬዚዳስ። \* 6 ዳር አሳ ቃላ ገሪስ ሚሳቲዛይ፣ ሻፋ ሃላ ገሪስ ሚሳቲዛ ገሪስ፣ ዋልቃማ ዳዳ ገሪስ ሚሳቲዛ ገሪስ “ሃሌ ሉያ! ወርሲ ዳንዳዩዛ ጎዳይ ካዋቲስ! \* 7 ደርሳዛ ሳርጌ ጋላሲ ጋኪዳ ገሺኔ ኢዛ ሚሽራያ ገሪታ ኡቲዳ ገሺ ሃ ዩቲ፤ ኣኔ ኡፋዬቶስ! ኣኔ ኡፋይሳን ኢዛ ቦንቾስ። 8 ኢዛ ያልቁቲዛ ጌሻ ሎዎ ማይዎ ማይዓና ማላ ኢዚስ አማቲዳስ” ገሺን ሲያዲስ። ሄ ለዔ ማይዎዚ ጌሻታ ዓሎቴላ ኦሶ።

9 ሄሳፌ ኪታንቻዚ ታና “ጌዴ ደርሳዛ ሳርጌስ ያይጌቲዳይቲ ኣንጄቲዳይታ ጋዳ ዓፋ” ገዴስ። ካሌሊዲካ “ሃይሲ ቱሙ ያሳ ቃላ” ገዴስ። \*

10 ታካ ሄ ኪታንቻዛስ ጎይናናስ ኢዛ ቶሆ ቦላ ታ ሊጴን ጉፋናዲስ-ሺን ኢዚ ታና “ኣጋ! ሄሳሶ ኦሶፋ! ታካ ኔናራ ዬሱስ ኪርሰቶሳ ማርካቴላ ኦይኪዳ አሻታራ ኢሲፌ ኦሊዛይ፤ ኔኒ ያሳስ ጎይና! ዬሱሳ ማርካይ ቲንቢቲ ኣያና” ገዴስ።

## ቦላ ፓራ ቶጊዳዴ

11 ሄሳፌ ጉዬ ሳሎይ ደዬቲዳይሳ ታ ቤያዲስ። ቃሴካ ቦላ ፓራካ ቤያዲስ። ሄ ፓራዛ ቶጊዳይሲ አማኔቲዳዴኔ ቱማንቻ

---

\* 19:1 ሃሌ ሉያ ቢራሽላይ ኢብራዌታ ቃላራ “ዖሲ ጋላቲቶ” ጉሳ። \* 19:3  
 ኢሳ 34:10 \* 19:5 ማዛ 115:13 \* 19:6 ሂዚ 1:24፤ ማዛ 93:1፤ 97:1፤  
 99:1 \* 19:9 ማቶ 22:2-3

ጌቲቲዛዳ። ኢዚ ቃስ ቱማን ፐርዳሲኔ ኦሌቲስ። \* 12 ኢዛ ኣይፊቲ ታማ ላጮ ሚሳቲቲስ። ኢዛ ሁዔ ቦላ ዳሮ ዛወዳቲ ዳቲስ። ኢዛፕ ኣቲን ሃራ ኣሲ ኦኒካ ኤርንታ ሱንላ ኢዛ ቦላ ፃፊቲ ኡቲዳስ። \* 13 ኢዚ ቃስ ሱላን ማዴቲዳ ማይያ ማይዒዳስ። ኢዛ ሱንላይ ቃስ “ዮሳ ቃላ” ጌኣቲቲስ። 14 ቦላ ፓራታ ቶጊዲ ቦላኔ ጌሽ ጊዲዳ ሎዖ ማይያ ማይዒዳ ሳሎ ኦላንቻቲ ኢዛ ካሊዳ። 15 ኣይዛቤታ ኢዛራ ቃንዲዛ ቃራ ማሻይ ኢዛ ዲናፔ ኬዜስ። ኢዚ ኢስታ ቢራታ ጉፊራ ሃራና። ኢዚ ወርሲካ ዳንዳዪዛ ዮሳ ሚኖ ሃንቆ ቆንጨሲዛ ዋይኔ ጫጃ ዬዲዛሶን ኢስታ ዬዳና። \* 16 ኢዛ ማይያ ቦላኔ ኢዛ ዋዲራ ቦላ “ኢዚ ካዎታስ ካዎ፡ ጎዳታስ ጎዳ” ጊዛ ሱንላ ፃፊቲ ኡቲዳስ።

17 ሄሳፊ ጉዬ ቃስ ኣዎ ኣርሼ ቦላ ኤቂዳ ኢሲ ኪታንቻ ቤያዲስ። ኢዚ ቃስ ሳሎ ቦላ ፐራዲዛ ካፎታስ “ዎጋ ዮሳ ዲጊሳ ማናስ ሃ ዪቲ! ሃ ሽቂቲ! 18 ካዎታ ኣሾ፡ ኦላንቻታ ኣዛዚዛይታ ኣሾ፡ ጎባ ኦላንቻታ ኣሾ፡ ፓራታ ኣሾኔ ፓራ ቶጊዛይታ ኣሾ፡ ጎዳታ ኣሾኔ ኢስታ ኣሽካራታ ኣሾ፡ ጉላ ናይታኔ ጨማ ኣሳታ ኣሾ ጊዲዳ ኣሳ ኡባ ኣሾ ሃ ዪዲ ሚቲ!” ጊሼ ጌታ ቃላን ዋሲዳስ

19 ሄሳላካ ደዓዚኔ ቢታ ካዎቲ ኢስታ ኦላ ኣሲካ ቦላ ፓራ ቶጊዳይሳራኔ ኢዛ ኦላ ኣሳራ ኦሌታናስ ሽቂዳይታ ቤያዲስ። 20 ጊዶ ኣቲን ሄ ደዓዚ ኦይኬቲዳስ። ካሴ ኢዛራ ዳሮ ማላታ ኦሊዳ ዋርዶ ናቤዚካ ኢዛራ ኦይኬቲዳስ። ኢዚ ቃስ ሄ ደዓዛ ማላታይ ኢስታ ቦላ ዲዛይታኔ ሄ ደዓዛ ሚሲሌዛሰ ጎይኒዳይታኔ ጌታ ማላታታ ኦሊ ኦሊዲ ኢስታ ባሌሊሽ ጋምዒዳስ። ሄይቲ ናምዓቲ ዲኔ ጌቲቲዛ ታማን ኤዲዛ ታማ ኣባን ሃይቆንታ ፓፃ ዲሼ ዩጌቲዳ። \* 21 ሃንኮ ኣቲዳይቲ ቃስ ቦላ ፓራ ቶጊዳይሳ ዲናፔ ኬዚዳ ማሻን ሃይቂዳ፤ ካፎቲካ ዉሪ ኢስታ ኣሾዛ ሚ ካሊዳ።

# 20

## ሺ ላይላ ካዎቲላ

1 ሄሳፊ ጉዬ ጨማ ኦላዛ ደዪዛ ቁልፔኔ ጌታ ሳንሳላታ ባ ኩሼን ኦይኪዳ ኪታንቻይ ሳሎፔ ዲጌ ዎዲሽን ታ ቤያዲስ። 2 ሄ ደዋዛ ኦይኪዲ ሺ ላይላ ቃቺዳስ። ሄሲ ደዋዚ ዳቡሎሳ ዎይኮ

---

\* 19:11 ሄዚ 1:1-3፤ ማዛ 96:13፤ ኢሳ 11:4 \* 19:12 ዳኔ 10:6 \* 19:15 ማዛ 2:9፤ ኢሳ 63:3፤ ኢዩ 3:13፤ ኣጂ. 14:20 \* 19:20 ኣጂ. 13:1-18

ፃላዔ ጌቴተዛ ካሴ ቤኒ ሾሻዛ። \* 3 ሺ ላይላ ጋካናሰ ኢዚ ዴሬ ኣሳ ባሌላንታ ማላ ሄ ኪታንቻዚ ዳዌዛ ዱጌ ጨማ ኦላን ዩጊዴሰ፤ ኢዛ ቦላ ጎርዲዲ ማታማ ዋሊዴሰ። ኢዚ ሄሳፊ ጉላ ዋዴሰ ቢርሼታናሰ ቤሴሰ።

4 ሄሳፊ ጉዬ ታኒ ኣልጋታ ቤያዲሰ። ሄ ኣልጋታ ቦላ ፒርዳ ፒርዳናሰ ጎዳቴሊ ኢሰታሰ ኢሜቴዳይቴ ኡቴዳይታ ቤያዲሰ። ቃሴካ ዩሱሳ ጊሽ ኢሰቲ ማርካቴዳ ጊሺኔ ያሳ ቃላ ጊሽ ኢሰታ ቆዴይ ቃንፃቴዳ ኣሳታ ሽምፖካ ቤያዲሰ። ሄይታንቲ ደዳዛሲኔ ኢዛ ሚሲሌዛሰ ጎይኒቤቴና። ኢዛ ማላታካ ባ ሊጴ ቦላ ጊዲን ባ ኩሼ ቦላ ዋላንታይታ። ኢሰቲ ሃይቆፔ ዴንዲዳ ኪርሰቶሳራ ኢሲፊ ሺ ላይላ ካዋቴዳ። \* 5 ሃንኮ ኣቴዳ ሃይቁላቴ ቃሰ ሄ ሺ ላይላይ ፖሌታና ጋካናሰ ሃይቆፔ ዴንዲቤቴና። ሄሲካ ሃይቆፔ ኮይሮ ዴንላ። 6 ኮይሮ ዴንላን ዲዛይቴ ሄይቴ ኣንጃቴዳይታኔ ጌሻታ። ናምዓንሉ ሃይቆይ ኢሰታ ቦላ ዋልቃይ ዴና። ኢሰቲ ያሳ ቁሴታኔ ኪርሰቶሳ ቁሴታ ጊዳና። ኢሰቲ ኪርሰቶሳራ ሺ ላይላ ካዋታና።

**ፃላዔ ያኔቴላ**

7 ሄ ሺ ላይላይ ፖሌቴዳ ማላ ፃላዔይ ባ ቃሽቴዳሶፕ ቢርሼታና። 8 ኣላሚ ቦላ ዲዛይቴ ሄይቴካ ጎጌኔ ማጎጌ ጌቴቴዛይታ ባሌላናሲኔ ኢሰታ ኦላሰ ኤኪ ባናሰ ኬዛና፤ ሄይታንታ ቆዳይ ኣባ ኣቻን ዲዛ ኣጩ ማላ። \* 9 ኢሰቲ ኩሚላ ቢታ ቦላ ላሌቴዲ ጌሻቴ ዲዛሶዮ ደሴቴዳ ካታማዮ ጊደሊዳ ሺን ሳሎፔ ዋዲዳ ታማይ ኢሰታ ዲፒ ሂሰቴ ፀጊዴሰ። 10 ካሴ ኢሰታ ባሌሊዳ ዳቡሎሲ ሄ ደዳዛኔ ዋርዶ ናቤዚ ዲዛሶይ ዲኔን ኤፂዛ ታማ ኣባ ጊደን ዩጌቴዳ። ኢሰቲ ሄን ቃማኔ ጋላሰ ሜርናፔ ሜርና ጋካናሰ ፀጊታና።

11 ሄሳፊ ጉዬ ኢሲ ጊታ ቦላ ኣልጋኔ ሄ ኣልጋ ቦላ ኡቴዳይሳ ቤያዲሰ፤ ቢታይኔ ሳሎይ ኢዛ ሲንሳፊ ባቃቴዳ ሺን ኢሰቲ ቢዲ ጌላናሶይ ቤቴቤና። \* 12 ሄ ኣልጋዛ ሲንሳን ሃይቁዳ ጨማታኔ ናቴላታ ቤያዲሰ። ማፃፋቴካ ደዩቴዳ ሃራ ዴዎ ማፃፋይካ ደዩቴዳሰ፤ ሃይቁዳይቴካ ማፃፋታን ካሴ ፃፊቴ ዲዛ ባ ኦሶ ኦሶ ማላ ፒርዳ ኤሲዳ። 13 ኣባይካ ባ ጋርሳን ዲዛ ሃይቁላታ ኣሚዴሰ። ሃይቆይኔ ዲፎይ ቃሰ ባ ጊደን ዲዛይቴ ካሴ ሃይቁዳይታ ኣሚዳ። ኢሲ ኢሲ ኣሲ ባ ኦሶ ኦሶ ማላ ፒርዳ

\* 20:2 ሜዴ 3:1 \* 20:4 ዳኔ 7:9፣22 \* 20:8 ሂዚ 38:2፣9፣15  
\* 20:11 ዳኔ 7:9-10



ኤኪዳስ። 14 ሃይቆይኔ ዱፎይ ታማ ኣባ ጊዶ ዩጌቲዳ። ሄ ታማ ኣባዚ ናምዓንሳ ሃይቆ። 15 ኢዛ ሱንሉ ዴዎ ማፃፋን ፃፌቶንታዳይ ዉሪካ ታማ ኣባን ዩጌቲዳስ።

# 21

## ኦራሳ ሳሎን ኦራሳ ሳዓ

1 ሃሳፌ ጉዬ ታኒ ኦራሳ ሳሎን ኦራሳ ሳዓ ቤያዲስ። ካሴ ሳሎይኔ ካሴ ቢታይ ኣጂ ቢዳ። ሃይሳፌ ጉዬ ኣባይካ ዴና። \*

2 ጌሻ ካታማያ ኦራሳ ዩሩሳላሜይ ባ ኣዚናስ ጊጌቲዳ ሚሽራ ማላ ሎዓ ጊጌታዳ ሳሎ ያሳ ኣቻፌ ዎጂሺን ታኒ ቤያዲስ። \*

3 ኣልጋዛፕ “ሄኮ ያሳ ኣቆሶይ ኣሳራ ዴስ። ኢዚ ኢስታራ ዳና። ኢስቲካ ኢዛ ዴሬታ ጊዳና። ያሲ ባ ቦንቸን ኢስታራ ኢሲፌ ጊዳና። ኢዚ ኢስታ ያሰ ጊዳና። \* 4 ኢዚ ኢስታ ኣይፌፔ ኣፋንሳ ዉርሲ ቁጫና። ካሴ ዎጋይ ኣጂዳ ጊሽ ሃይቆይ ዎይኮ ሙዞቴሉ ዎይኮ ዩሆይ ዎይኮ ዎዬይ ሃይሳፌ ጉዬ ዴና” ጊዛ ጊታ ቃላይ ኬዚሺን ታኒ ሲያዲስ። \*

5 ሄ ኣልጋ ቦላ ኡቲዳይሲካ “ሄኮ ታኒ ዉርሳካ ኦራሉ ኬሳና!” ጊዴስ። ቃሴካ ታና “ሃይሲ ቃላዚ ኣማኔቲዳ ቱሙ ጊዲዳ ጊሽ ኔ ሃይሳ ፃፋ!” ጊዴስ። 6 ሃሳፌ ጉዬ ታስ “ፖሊቲዴስ! ኣልፋይኔ ኦሚጋይ፤ ኮይርይኔ ዉርሴሉ ታና፤ ሳሞቲዳዴስ ታኒ ዴዎ ፑልቶ ሃሉ ሚሽ ቃንፂሶንታ ኢዛስ ጮ ሚላ ኢማና። \* 7 ያኒዳዳይ ሃይሳ ላታና። ታካ ኢዛዴስ ያሳ ጊዳና። ኢዚካ ታስ ና ጊዳና። \*

8 ጊዶ ኣቲን ሃንኮ ባቦቲ፣ ኢስታስ ኣማኔቶንታይቲ፣ ቱናቲ፣ ኣሳ ሽምፖ ዎጂዛይቲ፣ ላይማቲዛይቲ፣ ቢቲዛይቲ፣ ኤቃስ ጎይኒዛይቲ፣ ዎርዶቲዛይቲ፣ ሄይታ ኡባታ ቃዳይ ዲኔን ኤፂዛ ታማ ኣባ ጊዶን ጊዳና። ሄሲካ ናምዓንሳ ሃይቆ” ጊዴስ።

## ኦራሳ ዩሩሳላሜ

9 ዉርሴላን ላፑን ቦሻቲ ኢስታን ኩሚዳ ላፑን ፀዋታ ኦይኪዳ ላፑን ኪታንቻታፔ ኢሶይ ታኮ ዩዲ ታና “ሃ ያ! ታ ኔና ደርሳዛ ማቼዎ ሚሽራዮ ቤሳና” ጊዴስ። 10 ኢዚ ታና ኣያናን ኢሲ ጊታ ጂቃ ዙማ ቦላ ኬሲዲ ጌሻ ካታማያ ኦራሳ ዩሩሳላሜይ ያሳ ኣቻፌ

---

\* 21:1 ኢሳ 65:17፤ 66:22፤ 2ጴፅ 3:13 \* 21:2 ኢሳ 52:1፤ ኣጂ 3:12፤ ኢሳ 61:10 \* 21:3 ሂዚ 37:27፤ ሉዌ 26:11-12 \* 21:4 ኢሳ 25:8፤ 35:10፤ 65:19 \* 21:6 ኢሳ 55:1 \* 21:7 2ሳሜ 7:14፤ ማዛ 89:26-27

ሳሎፔ ዋጂዛር ቤሲዳስ። \* 11 ኢዛካ ያሳ ቦንቾን ፖሲሳዉስ። ኢዚ ፖዎዛ ሎዔቴላይ ቃስ ኬሂ ቦንቾቴዛ ሹቻ ማላኔ ቢሪሌ ማላ ጌሺኔ ኢያሲጲዳ ጌቴቴዛ ኢንቆ ማላ። 12 ኢዚስ ታማኔ ናምዑ ፔንጌታራ ዲዛ ጌታ ኣዲሳ ጊንቤ ላሻይ ዳስ። ሄ ታማኔ ናምዑ ፔንጌታን ታማኔ ናምዑ ኪታንቻቴ ኤቂዲ ናጌቴስ። ሄ ፔንጌታ ቦላ ታማኔ ናምዑ ኢሰራዔሌ ኮቻታ ሱንሌ ፃፊቴ ኡቴዳስ። 13 ኣርሼይ ሞኪዛ ባጋራ ሄቹ ፔንጌይ ዳስ። ፑዳ ባጋራ ሄቹ ፔንጌይ ዳስ። ዲጌሃ ባጋራ ሄቹ ፔንጌይ ዳስ። ኣርሼይ ዉሊዛ ባጋራ ሄቹ ፔንጌይ ዳስ። 14 ሄ ካታማይ ጊንቤ ላሻዛስ ታማኔ ናምዑ ዋና ማሳራቴቴ ዳቴስ። ሄ ማሳራቴታ ቦላ ታማኔ ናምዑ ሄ ደርሳዛ ሃዋሬታ ሱንሌ ፃፊቴ ኡቴዳስ።

15 ሄሳ ታስ ዮቴዳ ኪታንቻዛስ ሄ ካታማዮኔ ኢዚ ፔንጌታ ቃሴካ ሄ ጊንቤ ላሻዛ ኢዛራ ዋጂዛ ዋርቃ ዛንጌይ ዳስ።

\* 16 ሄ ካታማይ ኣዲሳቴሌኔ ኣሆቴሌ ኦይዱ ባጋራካ ኢሲ ጊና። ሄ ኪታንቻይካ ካታማዮ ባ ኢዛራ ዋጂዛ ዋጃ ዛንጌዛራ ዋጂን ኣዲሳቴላይ ታማኔ ናምዑ ሺ ኪሎሜቴሬ ማላ ጊዲዳስ። ኢዚ ጳቃቴሌኔ ኣሆቴሌካ ኢዚ ኣዲሳቴላ ጊና ጊዲዳስ። 17 ኪታንቻዚ ጊንቤዛ ዋጂዳስ። ሄ ኪታንቻዚ ኢዛራ ዋጂዛ ሚሻዚ ኤሬቴዳ ዋጃ ሚሻዚ ጃታኔ ኦይዱ ታማኔ ኦይዱ ሜትሬ ማላ ጊዲዳስ። 18 ሄ ጊንቤዚ ጊንቤቴዳይ ኢያሲጲዳ ጌቴቴዛ ሹቻና። ሄ ካታማያካ ማሰቶቴ ማላ ጌያ ኡቴዳ ጌሻ ዋርቃፊ ኦሴታዱስ። \* 19 ሄ ካታማይሲ ጊዶ ማሳራቴ ሹቻይ ዲማ ዲማ ኣልዖ ሹቻን ሎዒ ጊጊዳስ። ኮይር ማሳራቴዚ ኢያሲጲዳ፣ ናምዓንሉዚ ሲምፔሬ፣ ሄቸንሉዚ ኬልቁዶኔ፣ ኦይዳንሉዚ ማርጊዳ፣ 20 ኢቻሻንሉይ ሳርዶንኪሴ፣ ኡሱፑንሉይ ሳርዲዮኔ፣ ላፑንሉይ ኪርሰቶሎቤ፣ ኦሰፑንሉይ ቢሪሌ፣ ኡዱፋንሉይ ቶጳዚዮኔ [ዉራዉሬ]፣ ታማንሉይ ኪርሰጲራሲሴ፣ ታማኔ ኢሲንሉይ ያኪንቴ፣ ታማኔ ናምዓንሉይ ኣሜቴሰዲኖሴ ጌቴቴዛ ሹቻታፔ። 21 ሄ ታማኔ ናምዑ ፔንጌቴካ ታማኔ ናምዑ ኢንቆታ። ፔንጌቴ ዉሪካ ኢሶይ ኢሶይ ኢሲ ኢንቆፊ ኦሴቴዳ ሄ ካታማይ ጊዶ ኦይ ማሰቶቴ ማላ ሃ ዛሪ ቤሲዛ ሙሩታ ዋርቃፊ ኦሴቴዳስ።

22 ዉርሲ ዳንዳዪዛ ጎዳ ያሲኔ ደርሳዚ ኢዚስ ያሳ ኬሌ ጊዲዳ ጊሽ ሄ ካታማይ ጊዶን ሃራ ያሳ ኬሌ ቤያቤኬ። 23 ያሳ

\* 21:10 ሃዚ 40:1-2 \* 21:15 ሃዚ 40:3 \* 21:18 ኢሳ 54:11-12

ቦንቾይ ኢዚሰ ፖሊዛ ጊሽኔ ደርሳዚ ኢዚ ፖይ ጊዲዳ ጊሽ ሄ ካታማይሰ አዋ ኦርሼይ ዋይኮ ኦጊናይ ፖሊሳናሰ ኮሼና። \*  
 24 ዳሬቲ ኢዚ ፖግዛን ሲሜሬታና። ቢታ ካዋቲ ዉሪካ ባ ቦንቾ ኢዚሰ ኤሃና። 25 ሄ ካታማይን ቃማይ ባይንዳ ጊሽ ኢዚ ፔንጌቲ ኣይ ዋዳካ ጎርዳቲቲና። 26 ሃራ ካዋታ ጊታቴሴኔ ቦንቾይ ኢዚሰ ያና። 27 ሃራሲዛ ሚሺ ሙሌካ ጌዳ ኢዚን ጌሌና። ቱናቴሉ ኦሊዛይቲኔ ዋርዶ ሃሳዪዛይቲ ሙሌካ ሄ ኢዚኮ ጌሌቲና። ሄ ኢዚን ጌላናይታ ሱንላ ካሴ ሄ ደርሳዛ ዳዎ ማፃፋን ፃሬቲዳይታ ፃላላ። \*

## 22

1 ሃሳፌ ጉዬ ሄ ኪታንቻዚ ያሳ ኣልጋፌኔ ደርሳዛ ኣልጋፌ ኬዚዛ ማሰቶቲ ማላ ጂሎ ቁዢ ጊዲዳ ዳዎ ሃሳ ሻፋ ታና ቤሲዳሰ። 2 ሄ ሻፋዚ ሄ ካታማይሰ ዋና ኦጌዛ ጊዶ ኣዳን ሻኪ ዩጊዲ ኣጂ ቤሰ። ሄ ሻፋዛሰ ሃዲርሳ ባጋራኔ ኡሻቻ ባጋራ ኦጊናን ኦጊናን ፓጩይ ባይንዳ ላይላን ታማኔ ናምቡ ኦጊና ኩሜሰ ኣይፊዛ ዳዎ ሚላ ዳሰ። ሄ ሚላ ሃይላይ ዳሬ ፓሌሰ። 3 ሃሳፌ ጉዬ ቃንጌሉ ሙሌካ ዳና። ያሳ ኣልጋይኔ ደርሳ ኣልጋይ ሄ ካታማይን ዳና። ኢዛ ኦሳንቻቲ ኢዛሰ ጎይናና። 4 ኢሰቲ ኢዛ ኣይፊሰ ቤያና። ኢዛ ሱንላ ኢሰታ ሊጶ ቦላ ዳና። 5 ሃሳፌ ጉዬ ቃማይ ዳና። ጎዳ ያሲ ኢሰታሰ ፖሊዛ ጊሽ ታማ ፖይ ዋይኮ አዋ ኦርሼ ፖይ ኢሰታሰ ኮሼና። ኢሰቲ ሜርናፔ ሜርናሰ ካዋታና።

### ዬሱሳሰ ናምዓንሉ ዩሰ

6 ሃሳፌ ጉዬ ኪታንቻዚ ታሰ “ሃይቲ ቃላቲ ኣማኔቲዳይታኔ ቱማታ። ናቤታ ሃሳይሲዛ ጎዳ ያሲ ማታ ዋዳ ሃናናይሳ ባ ኦሳንቻታሰ ቆንጩሳናሰ ባ ኪታንቻዛ ኪቲዳሰ” ጊዳሰ።

7 ዬሱሲካ “ሄኮ ታ ኤሶን ያና፤ ሃይሳ ማፃፋዛ ቲንቢቲ ቃላ ናጊዛዳይ ኢዚ ኣንጄቲዳዳ” ጊዳሰ።

8 ሃይታ ሃ ዮጋታ ሲዩዳይኔ ቤዩዳይ ታና ዮሃኒሳ። ታኒ ሃይታ ሃ ዮጋታ ሲዩዳ ዋዳኔ ቤዩዳ ዋዳ ሃይታ ሃ ዮጋታ ታና ቤሲዳ ኪታንቻዛ ሲንላን ኢዛሰ ጎይናናሰ ሆካዳ ኢዛ ቶሆ ቦላ ከንዳዲሰ። 9 ሄ ኪታንቻዚ ቃሴ “ሃይሶ ኣጋ! ሃይሳሉ ኦሶፋ! ታካ ኔናራ ኔ ኢሻታራኔ ናቤታራ ቃሴካ ሃይሳ ማፃፋዛ ቃላ ፖሊዛ

\* 21:23 ኢሳ 60:19-20 \* 21:27 ኢሳ 52:1፤ ሄዚ 44:9

አሳታራ አሉዛዳ። ኔኒ ያሳሰ ፃላላ ጎይና” ጊዳሰ። 10 ቃሴካ “ዎዳይ ማተዳ ገሽ ኔኒ ሃይሳ ማፃፋዛን ፃፊተዳ ቲንቢቲ ቃላ ማታሜን ጎርዶፋ። 11 ሃይሳፊ ጉዬ ማካልዛይ ጉጂ ማካሎ፣ ቱናይካ ቱኖ፣ ዲሎይካ ዲሊ ካሎ፣ ጌሻይካ ጌዮ” ጊዳሰ

12 “ሄኮ! ታ ኤሶን ያና! አሳዳሰ አሳዳሰ አዛ ኦሶ ማላ ታ አዛሰ አዛሰ አማና ዋጋ ታኒ ታ ኩሼን ኦይካ ኡታዲሰ። 13 አልፋይኔ አሜጋይ፣ ሲንሉኔ ጉዬይ፣ ኮይርይኔ ወርሴሉ ታና” ጊዳሰ።

14 ሄ ዴዎ ሚላ አይፊ ማናሲኔ ሄ ካታማዮ አዚ ፔንጌራ ጌላናሰ ቤሲዛይቲ ባ ማይዎ ሜጪዳይቲ አንጃቲዳይታ። 15 ካና ማላ ጮ ሆሉ ሆሉዛይቲ ቢታ ቢቲዛይቲ፣ ላይማተዛይቲ፣ ሸምፖ ዎጂዛይቲ፣ ኤቃሰ ጎይኒዛይቲ፣ ዎርዶ ሰቁዛይቲኔ ዎርዶ አሉዛይቲ ወሪካ ሄ ካታማይፔ ካሬን አታና።

16 “ታኒ ዬሱሲ ሃይሳ አንቴሰ ማርካታና ማላ ታ ኪታንቻዛ ዎሳ ኬላታሰ ዬዳዲሰ። ታሰ ዬሌቴሳ ዛርኬይኔ ቆሞይ ካሴ ዳወቲኮ። ታኒ ፖሲሲዛ ዎንታ ያሊንቴ።”

17 ዲሎ አያናይኔ አዛ ሚሺራያ “ሃያ!” ጌቴሰ። ሄሳ ሲዩዛይይካ “ኔ ሃያ!” ጎ። ሳሞቲዳይይካ ሃዮ፣ ኮይዳይይ ዴዎ ሃሌ አይኮ ዋጋካ ቃንዳንታ ጮ ሜላ ኡዮ።

18 ሄኮ ታኒ ሃይሳ ማፃፋዛን ፃፊተዳ ቲንቢቲ ቃላ ሲዩዛይቲ ናጌታና ማላ ዮታይሰ። አኒካ ሃይሳ ሃ ቃላ ቦላ አይኮካ ጉጂኮ ሃይሳ ሃ ማፃፋዛን ፃፊተዳ ቦሻታ ያሲ አዛ ቦላ ጉጃና። 19 አኒካ ሃይሳ ቲንቢቲ ማፃፋን ፃፊተዳ ቃላታፔ አሲኖካ ፓጪሲኮ ሃይሳ ሃ ማፃፋዛን ዮቴተዳ ዴዎ ሚላ አይፊፔኔ ጌሻ ካታማይፔ ያሲ አዛ ጊሻዛ ፓጪሳና።

20 ሃይታንታ ታ ማርካቲዛይሲ “ታኒ አዳፊ ኤሶን ያና!” ጌሰ። አሚን! ጎዳ ዬሱሳ ሃያ።

21 ጎዳ ዬሱሳ ኪያቴሉ አንቴናራ ኡባትራ ጊዶ። አሚን! \*

\* 22:21 ኡባታራ አሲ አሲ ጌሻ ማፃፋቲ “ወሪሶታራ” ጊሸን ሃራይቲ ቃሴ “ዶላ ዴሬታራ” ጌቴሰ። ቃሴካ “ዶላ ዴሬ ኡባታራ” ጊዛይቲካ ዴቴሰ።

**ኦሪሳ ጩቆ ማፃፋ ንሞሉ**

**New Testament in Gamo (ET:gmv:Gamo)**

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gamo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source  
files dated 29 Jan 2022  
dffa0cbb-5f77-5875-bf95-f4176677af45